

AKTA POLIS 1967

(Akta 344)

SUSUNAN SEKSYEN-SEKSYEN

BAHAGIAN I PERMULAAN

Seksyen

1. Tajuk ringkas dan pemakaian.

BAHAGIAN II TAFSIRAN

2. Tafsiran.

BAHAGIAN III POLIS DIRAJA MALAYSIA

3. Keanggotaan Pasukan Polis.
4. Kawalan Pasukan.
5. Perlantikan Ketua Polis Negara, dll.
6. Kawalan Polis Diraja Malaysia dalam sesuatu Negeri, dll.
7. Mengguna khidmat Pasukan dalam masa darurat.

BAHAGIAN IV PEGAWAI POLIS TAMBAHAN DAN KONSTABEL PENJAGA

8. Pegawai polis tambahan.
9. Konstabel penjaga.

BAHAGIAN V
PERKHIDMATAN DI LUAR MALAYSIA DAN
PERKHIDMATAN POLIS DARI WILAYAH-WILAYAH
LAIN DALAM MALAYSIA

Seksyen

10. Yang di-Pertuan Agong boleh mengarahkan Polis Diraja Malaysia berkhidmat di luar Malaysia.
11. Pegawai-pegawai yang berkhidmat di luar Malaysia hendaklah tertakluk kepada Akta ini.
12. Layanan bersaling.

BAHAGIAN VI
PERLANTIKAN, PERKHIDMATAN, DLL.

13. Akuan oleh pegawai polis apabila dilantik.
14. Perakuan perlantikan.
15. Persaraan atau perletakan jawatan dalam masa perang atau darurat.
16. Perletakan jawatan semasa prosiding disiplin belum selesai.
17. Senjata, perlengkapan, dll., hendaklah diserahkan apabila tidak lagi menjadi anggota Pasukan.
18. Pegawai-pegawai polis tertakluk kepada peruntukan-peruntukan yang terpakai kepada pegawai-pegawai awam.

BAHAGIAN VII
TUGAS-TUGAS DAN KUASA-KUASA PEGAWAI POLIS

19. Pegawai polis hendaklah disifatkan sebagai bertugas.
20. Tugas-tugas am pegawai polis.
21. Tugas di jalan awam.
22. Harta yang tidak dituntut.
23. Estet yang tidak dituntut.
24. Kuasa pegawai polis untuk memeriksa lesen, kenderaan, dll.
25. Kuasa untuk menahan dan memeriksa pesawat udara.
26. Kuasa untuk mendirikan sekatan-sekatan jalan.
27. Kuasa untuk mengawalselia perhimpunan, perjumpaan dan perarakan.

Seksyen

- 27A. Kuasa untuk menghentikan aktiviti-aktiviti tertentu yang diadakan di tempat selain daripada di suatu tempat awam.
- 27B. Penggunaan kekerasan dalam menyuraikan atau menangkap orang-orang menurut seksyen 27 atau 27A.
- 27C. Keizinan untuk mendakwa kesalahan-kesalahan di bawah seksyen 27 atau 27A.
- 28. Kuasa untuk mengawalselia permainan muzik di tempat awam.
- 29. Kuasa untuk membuat kaedah-kaedah dan perintah-perintah bagi mengawal lalulintas.
- 30. Kuasa untuk membuat perintah-perintah bagi mengawal penunjukan bendera-bendera, dll.
- 31. Kuasa untuk membuat perintah-perintah bagi menghendaki orang-orang berada dalam rumah.
- 32. Tiada liabiliti terhadap perbuatan yang dilakukan di bawah kuasa waran.
- 33. Pengecualian berkenaan dengan proses sivil.

BAHAGIAN VIII
SUKARELAWAN SIMPANAN POLIS DIRAJA
MALAYSIA

- 34. Penubuhan Sukarelawan Simpanan.
- 35. Anggota-anggota Sukarelawan Simpanan.
- 36. Perlantikan pegawai-pegawai polis sukarelawan simpanan, dll.
- 37. Pangkat sukarelawan-sukarelawan yang dilantik dalam Sukarelawan Simpanan.
- 38. Pegawai-pegawai polis sukarelawan simpanan boleh dikehendaki meletakkan jawatan.
- 39. Akuan oleh pegawai polis sukarelawan simpanan.
- 40. Perakuan perlantikan.
Perletakan jawatan.
- 42. Gaji dan elaun.
- 43. Mengerah Sukarelawan Simpanan.
- 44. Ketua Polis Negara boleh mengguna khidmat pegawai polis sukarelawan simpanan untuk menjalankan tugas-tugas polis.

Seksyen

45. Kuasa pegawai polis sukarelawan simpanan.
46. Menempatkan semula dalam pekerjaan sivilian.

**BAHAGIAN IX
POLIS BANTUAN**

47. Perlantikan pegawai polis bantuan.
48. Akuan hendaklah dibuat oleh pegawai polis bantuan.
49. Perakuan perlantikan.
- 49A. Gaji dan elaun.
50. Tugas-tugas dan kuasa-kuasa, dll.

**BAHAGIAN X
SIMPANAN POLIS DIRAJA MALAYSIA**

51. Simpanan Polis Diraja Malaysia.
52. Liabiliti untuk berkhidmat dalam Polis Simpanan.
53. Pegawai polis bersara yang tidak bertanggung berkhidmat boleh memilih untuk berkhidmat.
54. Tempoh perkhidmatan dalam Polis Simpanan.
55. Pengerahan Polis Simpanan.
56. Polis simpanan dikehendaki melapor.
57. Kuasa-kuasa pegawai polis apabila dikerah.
58. Pangkat dalam Polis Simpanan.
59. Gaji dan elaun.
60. Cuti.
61. Penahanan pencen.
62. Dilepaskan daripada Polis Simpanan.
63. Diberhentikan daripada Polis Simpanan dan rayuan.
64. Penamatan perkhidmatan dalam masa pengerahan.
65. Pakaian seragam dan peralatan.
66. Menempatkan semula dalam pekerjaan sivilian pegawai-pegawai polis dalam Polis Simpanan.

Seksyen

67. Penalti.

**BAHAGIAN XI
KOR KADET POLIS DIRAJA MALAYSIA**

68. Penubuhan Kor Kadet.
69. Anggota-anggota Kor Kadet.
70. Perlantikan, kenaikan pangkat dan pembuangan kerja Pegawai Kadet dan Kadet.
71. Perletakan jawatan.
72. Gaji dan elaun.
73. Pembubaran.

**BAHAGIAN XII
DISIPLIN**

74. Pegawai-pegawai polis tertakluk kepada peraturan-peraturan disiplin.
75. Denda didapati daripada potongan gaji.
76. Gaji penuh tidak terakru semasa tidak hadir tanpa kebenaran atau semasa dalam penjara.
77. Senjata, kelengkapan, dll., yang hilang atau rosak hendaklah diganti dengan potongan gaji.
78. Tahan kerja.
79. Jawatankuasa Siasatan bagi Jabatan berkenaan dengan kematian atau kecederaan mana-mana pegawai polis atau berkenaan dengan kehilangan atau kerosakan harta.
80. Kuasa pegawai kanan polis yang mengadakan penyiasatan untuk menyaman saksi-saksi.

**BAHAGIAN XIII
KUMPULAN WANG POLIS**

81. Kumpulan Wang Polis.
82. Kumpulan Wang Polis dan maksud-maksud Kumpulan Wang.
83. Pemindahan Kumpulan Wang.
84. Tafsiran.

BAHAGIAN XIV

AM

Seksyen

85. Membawa senjata.
86. Pembolosan.
87. Dahagi.
88. Penalti kerana menyebabkan penderhakaan.
89. Memiliki, membuat, menjual atau membekalkan secara haram peralatan-peralatan yang dibekalkan kepada pegawai polis dan penggunaan pakaian seragam polis tanpa kebenaran.
90. Kelakuan tak senonoh di balai polis.
91. Pegawai polis boleh menangkap tanpa waran bagi kesalahan-kesalahan di bawah seksyen 31 (2), 86, 87, 89 dan 90.
92. Pegawai polis tidak boleh menjadi anggota Kesatuan Sekerja.
93. Persatuan-persatuan polis.
94. Penalti am.
95. Kaedah-kaedah.
96. Peraturan-Peraturan Polis.
97. Perintah Tetap.
98. Pemansuhan dan kecualian.
99. Masa peralihan.
100. Mengubahsuai undang-undang lain.

JADUAL PERTAMA—Pangkat Polis.

JADUAL KEDUA—Akuan Jawatan.

JADUAL KETIGA—Pemansuhan.

AKTA POLIS 1967*

(Akta 344)

SUATU AKTA berhubungan dengan organisasi, disiplin, kuasa-kuasa dan tugas-tugas Polis Diraja Malaysia dan perkara-perkara yang bersampingan dengannya.

[29hb Ogos 1967.] [PU 385/67]

MAKA INILAH DIPERBUAT UNDANG-UNDANG oleh Duli Yang Maha Mulia Seri Paduka Baginda Yang di-Pertuan Agong dengan nasihat dan persetujuan Dewan Negara dan Dewan Rakyat yang bersidang dalam Parlimen, dan dengan kuasa daripadanya, seperti berikut:

BAHAGIAN I

PERMULAAN

1. Tajuk ringkas dan pemakaian.

- (1) Akta ini bolehlah dinamakan Akta Polis 1967, dan terpakai di seluruh Malaysia.
- (2) *(Ditinggalkan).*

BAHAGIAN II

TAFSIRAN

2.

*Akta ini disemak sehingga 1.9.1988 dan disiarkan sebagai Undang-undang Malaysia Akta 344. Akta yang disemak ini berkuatkuasa pada 6.10.1988.

Akta ini telah diubahsuai dan diperluaskan untuk dipakai bagi Wilayah Persekutuan Labuan melalui Perintah Wilayah Persekutuan Labuan (Pengubahsuai Akta Polis) 1985 [PU (A) 197/85], dibuat di bawah seksyen 6 (3) Akta Perlembagaan (Pindaan) (No. 2) 1984 (Akta A585). Sila lihat mukasurat 73.

“amunisi” ertinya amunisi untuk apa-apa senjata, dan meliputi granat, bom dan misil-misil lain yang serupa sama ada boleh digunakan dengan senjata atau tidak, dan sesuatu amunisi yang mengandungi, atau direkabentuk atau dipadankan untuk mengandungi, apa-apa cecair, gas atau benda lain yang merbahaya;

“daerah polis” atau “bahagian polis” ertinya mana-mana kawasan yang ditetapkan sebagai demikian oleh Ketua Polis Negara di bawah seksyen 6 (b) dan kecuali dan sehingga kawasan itu telah ditetapkan, ertinya mana-mana kawasan yang dijadikan atau diiktirafkan sebagai daerah polis atau bahagian polis pada masa Akta ini mula berkuatkuasa;

“Ketua Pegawai Polis” ertinya seseorang pegawai polis yang diberi kuasa oleh Ketua Polis Negara mengawal Polis Diraja Malaysia mengenai mana-mana kawasan atau Negeri di bawah seksyen 6 dan yang ditetapkan sebagai demikian oleh Ketua Polis Negara;

“Ketua Polis Negara” ertinya Ketua Polis Negara yang dilantik di bawah seksyen 5;

“konstabel” ertinya seseorang pegawai polis yang berpangkat rendah daripada Koperal dan termasuk seseorang Rekrut;

“Menteri” ertinya Menteri yang bertanggungjawab bagi polis;

“pegawai kanan polis” ertinya seseorang pegawai polis daripada apa-apa pangkat dan termasuk Ketua Polis Negara ke bawah hingga dan termasuk seseorang Inspektor dalam percubaan;

“Pegawai Memerintah” ertinya seseorang pegawai polis yang diberi kuasa oleh Ketua Polis Negara mengawal Polis Diraja Malaysia mengenai mana-mana Negeri, kawasan, tempat, formasi atau daerah polis di bawah seksyen 6 dan ditetapkan sebagai demikian oleh Ketua Polis Negara;

“pegawai polis” ertinya seseorang anggota Polis Diraja Malaysia;

“pegawai rendah polis” ertinya seseorang pegawai polis daripada apa-apa pangkat dari dan termasuk seseorang Sub-Inspektor ke bawah hingga dan termasuk seseorang Koperal;

“Pesuruhjaya” ertinya Pesuruhjaya Polis yang dilantik di bawah seksyen 5

“senjata” termasuk amunisi;

“Timbalan Ketua Polis Negara” ertinya Timbalan Ketua Polis Negara yang dilantik di bawah seksyen 5.

(2) Apa-apa rujukan dalam Akta ini dan mana-mana undang-undang bertulis yang lain kepada seorang pegawai polis yang berpangkat tertentu hendaklah termasuk mana-mana pegawai polis yang sedang memangku, atau dalam percubaan atau dalam latihan, dalam pangkat sedemikian dan subseksyen ini hendaklah disifatkan sebagai bahagian yang melengkapkan bagi Akta ini dari masa Akta ini mula berkuatkuasa. [Mas. Akta
A516]

BAHAGIAN III

POLIS DIRAJA MALAYSIA

3. Keanggotaan Pasukan Polis.

(1) Semua orang yang sebelum sahaja Akta ini mula berkuatkuasa adalah anggota-anggota Polis Diraja Malaysia yang ditubuhkan di bawah Akta Polis Diraja Malaysia 1963, hendaklah apabila Akta ini mula berkuatkuasa menjadi anggota-anggota Polis Diraja Malaysia di bawah Akta ini (kemudian daripada ini disebut sebagai “Pasukan”) dengan pangkat yang bersamaan dan atas sifat yang bersamaan.

(2) Tiap-tiap orang yang tersebut dahulu hendaklah diambil kerja atas terma-terma dan syarat-syarat yang sama yang dipakai bagi mereka sebelum sahaja Akta ini mula berkuatkuasa.

(3) Tertakluk kepada Akta ini, Pasukan hendaklah diguna khidmat di dalam dan di seluruh Malaysia (termasuk perairan

wilayahnya) bagi memelihara undang-undang dan ketenteraman, mengekalkan keamanan dan keselamatan Malaysia, mencegah dan mengesan jenayah, menangkap dan mendakwa pesalah-pesalah dan mengumpul risikan keselamatan.

4. Kawalan Pasukan.

(1) Pasukan hendaklah di bawah perintah Ketua Polis Negara yang adalah seorang pegawai polis dan hendaklah bertanggungjawab kepada Menteri bagi kawalan dan arahan Pasukan dan semua orang lain yang dilantik atau diguna khidmat untuk menjalankan tugas-tugas polis, dan hendaklah mempunyai semua kuasa yang diberi kepada seorang Pesuruhjaya atau seorang Ketua Pegawai Polis.

(2) Maka hendaklah dilantik seorang Timbalan Ketua Polis Negara yang adalah seorang pegawai polis dan hendaklah berada di bawah arahan Ketua Polis Negara.

(3) Timbalan Ketua Polis Negara hendaklah mempunyai semua kuasa yang diberi kepada seorang Pesuruhjaya atau seorang Ketua Pegawai Polis.

(4) Mana-mana perbuatan atau perkara yang boleh dilakukan, diperintahkan atau dilaksanakan oleh Ketua Polis Negara di bawah undang-undang ini atau di bawah mana-mana undang-undang yang lain boleh, tertakluk kepada perintah dan arahnya, dilakukan, diperintahkan atau dilaksanakan oleh Timbalan Ketua Polis Negara, Pesuruhjaya, Timbalan Pesuruhjaya, Penolong Pesuruhjaya Kanan, atau Penolong Pesuruhjaya yang diberi kuasa secara am atau khas bagi maksud itu oleh Ketua Polis Negara; dan sekiranya dia berada di luar Malaysia atau tidak berupaya menjalankan tugas-tugasnya atau sedang bercuti, fungsi-fungsi Ketua Polis Negara di bawah undang-undang ini atau di bawah mana-mana undang-undang lain bolehlah dijalankan oleh Timbalan Ketua Polis Negara atau mana-mana pegawai polis lain yang berpangkat tidak rendah daripada Pesuruhjaya yang diberi kuasa oleh Yang di-Pertuan Agong.

5. Perlantikan Ketua Polis Negara, dll.

(1) Maka hendaklah dilantik seorang Ketua Polis Negara, seorang Timbalan Ketua Polis Negara dan beberapa Pesuruhjaya-Pesuruhjaya dan Timbalan-Timbalan Pesuruhjaya dan pegawai-pegawai kanan polis dan pegawai-pegawai rendah polis dan konstabel-konstabel sebagaimana disifatkan perlu bagi maksud melaksanakan Akta ini.

(2) Pangkat-pangkat bagi Pegawai-Pegawai Kanan Polis dan Pegawai-Pegawai Rendah Polis adalah seperti disenaraikan di dalam Jadual Pertama.

6. Kawalan Polis Diraja Malaysia dalam sesuatu Negeri, dll.

Anggota-anggota Pasukan hendaklah berkenaan dengan—

- (a) mana-mana kawasan atau Negeri yang ditentukan oleh Menteri, dikawal oleh seorang Pesuruhjaya atau Ketua Pegawai Polis; dan
- (b) mana-mana formasi, daerah polis atau bahagian polis atau kawasannya atau mana-mana tempat, dikawal oleh mana-mana pegawai polis yang ditentukan oleh Ketua Polis Negara sama ada dengan menyebut nama atau jawatannya.

7. Mengguna khidmat Pasukan dalam masa darurat.

(1) Yang di-Pertuan Agong boleh, dalam masa perang atau darurat lain, mengguna khidmat Pasukan atau mana-mana bahagiannya untuk berkhidmat bersama dengan Angkatan Tentera Malaysia atau mana-mana Angkatan Tempatan yang ditubuhkan di bawah mana-mana undang-undang, atau, secara lain, dalam mempertahankan Malaysia:

Dengan syarat bahawa mana-mana bahagian Pasukan yang diguna khidmat sedemikian hendaklah terus berada di bawah perintah Ketua Polis Negara atau mana-mana pegawai polis lain yang telah dilantik bagi maksud itu.

(2) Bagi maksud seksyen ini ungkapan “Pasukan” meliputi semua badan yang ditubuh atau didirikan bagi menjalankan tugas-tugas polis di bawah Akta ini.

BAHAGIAN IV

PEGAWAI POLIS TAMBAHAN DAN KONSTABEL PENJAGA

8. Pegawai polis tambahan.

(1) Pesuruhjaya atau Ketua Pegawai Polis boleh, dengan kelulusan Ketua Polis Negara, mengambil kerja orang-orang untuk berkhidmat secara sementara sebagai pegawai-pegawai polis tambahan bagi pangkat Sarjan Mejar atau ke bawah.

(2) Seseorang pegawai polis tambahan hendaklah disifatkan sebagai di bawah perjanjian untuk berkhidmat dari sebulan ke sebulan, setiap perjanjian tersebut bermula pada satu haribulan dan tamat pada hari terakhir pada tiap-tiap bulan yang berturutan.

(3) Seseorang pegawai polis tambahan boleh dilepaskan atau boleh meletak jawatan dengan diberi atau dengan memberi satu bulan notis bertulis oleh atau kepada Pesuruhjaya atau Ketua Pegawai Polis.

(4) Seseorang pegawai polis tambahan hendaklah mempunyai dan boleh menjalankan semua kuasa dan keistimewaan, dan hendaklah tertakluk kepada kuasa dan disiplin yang sama sebagai, seorang anggota Pasukan yang mempunyai pangkat yang bersamaan, dan hendaklah mematuhi semua arahan yang sah berkenaan dengan pelaksanaan tugas-tugasnya yang mungkin diterimanya dari semasa ke semasa daripada pegawai-pegawai atasannya.

9. Konstabel penjaga.

(1) Pesuruhjaya atau Ketua Pegawai Polis boleh, dengan kelulusan Ketua Polis Negara, atas permohonan oleh mana-mana orang (kemudian daripada ini, di dalam seksyen ini disebut sebagai “pemohon”) untuk seorang konstabel diambil bekerja

dengan tugas-tugas khas, mengambil kerja mana-mana orang yang sesuai sebagai konstabel penjaga bagi maksud-maksud tugas-tugas khas itu sahaja. Konstabel penjaga sedemikian hendaklah diambil kerja dengan perbelanjaan pemohon, yang hendaklah menyediakan tempat penginapan dan makanan untuk konstabel penjaga tersebut seperti yang dikehendaki oleh Pesuruhjaya atau Ketua Pegawai Polis dan bolehlah dikehendaki membayar bagi apa-apa pakaian seragam yang dibekalkan kepada konstabel penjaga tersebut atau mana-mana kadar dari itu yang boleh ditentukan oleh Pesuruhjaya atau Ketua Pegawai Polis:

Dengan syarat bahawa pemohon boleh, dengan memberi satu bulan notis kepada Pesuruhjaya atau Ketua Pegawai Polis, menghendaki supaya konstabel penjaga sedemikian ditarik balik daripada menjalankan tugas-tugas khas tersebut, dan dalam keadaan sedemikian, pemohon hendaklah tidak bertanggung bagi apa-apa perbelanjaan yang ditanggung berkaitan dengan pengambilan konstabel penjaga tersebut selepas hari terakhir bulan berikut di mana notis tersebut telah diberikan ke dalam hasil am Persekutuan.

(2) Apa-apa amaun yang kena dibayar daripada seorang pemohon di bawah seksyen ini boleh didapati oleh Pesuruhjaya atau Ketua Pegawai Polis sebagai hutang, dan, apabila diterima, hendaklah dibayar ke dalam hasil am Persekutuan.

(3) Seseorang konstabel penjaga hendaklah mempunyai dan boleh menjalankan semua kuasa dan keistimewaan, dan hendaklah tertakluk kepada kuasa dan disiplin yang sama sebagai, seorang konstabel Pasukan.

BAHAGIAN V

PERKHIDMATAN DI LUAR MALAYSIA DAN PERKHIDMATAN POLIS DARI WILAYAH-WILAYAH LAIN DALAM MALAYSIA

10. Yang di-Pertuan Agong boleh mengarahkan Polis Diraja Malaysia berkhidmat di luar Malaysia.

(1) Yang di-Pertuan Agong boleh, atas permintaan bagi maksud itu yang dibuat oleh Kerajaan sesuatu wilayah di luar Malaysia, dengan perintah mengarahkan mana-mana bahagian daripada Polis Diraja Malaysia yang didapatinya sesuai supaya menjalankan tugas-tugas polis dalam wilayah itu dan Yang di-Pertuan Agong hendaklah menyatakan dalam perintah itu bagi maksud apakah arahan itu dibuat.

(2) Tiada apa-apa perintah di bawah seksyen ini boleh dibuat melainkan Yang di-Pertuan Agong berpuas hati bahawa peruntukan-peruntukan yang memadai telah atau akan dibuat dengan segera dalam undang-undang wilayah yang tersebut dahulu itu—

- (a) bagi menguatkuasakan di dalam wilayah tersebut apa-apa kontrak perkhidmatan yang dibuat di antara anggota-anggota Polis Diraja Malaysia dan Kerajaan Malaysia;
- (b) bagi memberi kepada pegawai-pegawai polis Polis Diraja Malaysia yang berkhidmat di dalam wilayah tersebut di bawah seksyen ini kuasa-kuasa dan tugas-tugas pegawai polis di dalam wilayah tersebut; dan
- (c) bagi memastikan bahawa layanan bersaling diberi kepada Kerajaan Malaysia.

(3) Tertakluk kepada subseksyen (2), tiada seorang pun pegawai polis boleh dihantar ke luar Malaysia di bawah Bahagian ini melainkan Menteri berpuas hati bahawa perkiraan-perkiraan wajar telah dibuat bagi perkhidmatan pegawai-pegawai polis Malaysia dengan pihak-pihak berkuasa wilayah yang tersebut dahulu.

11. Pegawai-pegawai yang berkhidmat di luar Malaysia hendaklah tertakluk kepada Akta ini.

Semua pegawai polis yang berkhidmat dalam wilayah di luar Malaysia menurut subseksyen (1) seksyen 10 hendaklah tertakluk kepada Akta ini.

12. Layanan bersaling.

(1) Apabila, atas permintaan Kerajaan Malaysia dan pada menurut perintah yang dibuat oleh Kerajaan suatu wilayah lain, anggota-anggota pasukan polis wilayah tersebut dihantar ke Malaysia untuk menjalankan tugas-tugas polis di dalam Malaysia, anggota-anggota itu hendaklah tertakluk kepada subseksyen (3), berada di bawah perintah pegawai-pegawai atasan mereka sendiri yang ada bersama mereka dan hendaklah tertakluk kepada peraturan-peraturan yang sama seperti semasa berkhidmat di dalam wilayah itu.

(2) Apabila, mana-mana anggota pasukan polis suatu wilayah lain, menurut subseksyen (1), berada di dalam Malaysia, apa-apa kontrak perkhidmatan yang dibuat di antara mana-mana anggota badan itu dan Kerajaan wilayah itu boleh dikuatkuasa di dalam Malaysia dengan cara yang sama dan dengan efek yang sama seolah-olah kontrak itu telah dibuat di antara anggota-anggota itu dan Kerajaan Malaysia.

(3) Mana-mana anggota pasukan polis suatu wilayah lain yang berada dalam Malaysia sebagaimana tersebut dahulu hendaklah mempunyai dan boleh menjalankan kuasa-kuasa, dan hendaklah bertanggung bagi melaksanakan tugas-tugas, seorang pegawai polis Pasukan; dan anggota pasukan polis wilayah itu hendaklah tertakluk kepada kawalan keseluruhan seorang pegawai kanan polis Pasukan.

BAHAGIAN VI
PERLANTIKAN, PERKHIDMATAN, DLL.

13. Akuan oleh pegawai polis apabila dilantik.

Tiap-tiap pegawai polis dan pegawai polis tambahan hendaklah, apabila mula-mula masuk Pasukan atau sebelum mula menjalankan tugas-tugas jawatannya, membuat di hadapan seorang pegawai kanan polis berpangkat Penguasa atau ke atas akuan yang dinyatakan dalam Jadual Kedua mengikut apa-apa cara yang diakuinya sebagai paling berkesan pada perasaan hatinya.

14. Perakuan perlantikan.

Suatu perakuan perlantikan, dalam bentuk sebagaimana ditetapkan oleh Peraturan-Peraturan Polis, ditandatangani oleh seorang Pegawai Memerintah atau seorang pegawai kanan polis yang diberi kuasa olehnya bagi maksud itu, hendaklah dikeluarkan kepada tiap-tiap pegawai polis, pegawai polis tambahan dan konstabel penjaga dan hendaklah menjadi keterangan mengenai perlantikannya di bawah Akta ini.

15. Persaraan atau perletakan jawatan dalam masa perang atau darurat.

Tiada seorang pun pegawai polis boleh bersara atau meletak jawatan daripada Pasukan dalam masa perang atau semasa Pengisytiharan Darurat masih berkuatkuasa:

Dengan syarat bahawa seorang pegawai polis boleh bersara atau dibenarkan meletak jawatan jika disyorkan sedemikian oleh Ketua Polis Negara.

16. Perletakan jawatan semasa prosiding disiplin belum selesai.

Walau apa pun seksyen 15, tiada seorang pun pegawai polis, tanpa kebenaran bertulis Ketua Polis Negara, boleh meletak jawatan daripada Pasukan dalam masa belum selesai apa-apa

prosiding disiplin atau pendakwaan yang dibawa terhadapnya mengenai apa-apa kesalahan yang dia mungkin dituduh.

17. Senjata, perlengkapan, dll., hendaklah diserahkan apabila tidak lagi menjadi anggota Pasukan.

(1) Apabila seorang pegawai polis tidak lagi menjadi anggota Pasukan dia hendaklah dengan serta-merta menyerahkan balik kepada orang yang dilantik oleh Ketua Polis Negara bagi maksud itu, atau kepada pegawai polis yang mengetuai mana-mana bahagian Pasukan di tempat di mana dia akhir sekali ditempatkan, perakuan perlantikannya dan semua senjata, amunisi, perlengkapan, pakaian seragam, dan peralatan lain yang telah dibekalkan kepadanya dan yang mana adalah harta awam:

Dengan syarat bahawa Ketua Polis Negara boleh, tertakluk kepada Kaedah-kaedah yang dibuat di bawah Akta ini, dalam hal-hal khas membenarkan disimpan barang-barang tertentu, selain daripada senjata-senjata dan amunisi, atas apa-apa syarat yang ditetapkan oleh Perintah Tetap.

(2) Mana-mana pegawai polis yang, setelah tidak lagi menjadi anggota Pasukan, tanpa sebab yang baik tidak mematuhi subseksyen (1) adalah melakukan suatu kesalahan dan apabila disabitkan boleh dikenakan denda tidak melebihi satu ratus ringgit atau hukuman penjara selama tempoh tidak melebihi tiga bulan atau kedua-duanya, dan, sebagai tambahan, hendaklah bertanggungjawab membayar nilai harta yang tidak diserahkan balik itu, dan nilai itu boleh ditentukan oleh mahkamah secara terus dan boleh didapatkan kembali sebagai suatu denda.

(3) Dalam seksyen 15 dan 16 dan dalam seksyen ini ungkapan “pegawai polis” meliputi semua orang yang dilantik atau diambil kerja untuk menjalankan tugas-tugas polis di bawah Akta ini; dan ungkapan “Pasukan” termasuk semua badan yang ditubuhkan atau didirikan untuk menjalankan tugas-tugas polis di bawah Akta ini.

18. Pegawai-pegawai polis tertakluk kepada peruntukan-peruntukan yang terpakai kepada pegawai-pegawai awam.

Kecuali sebagaimana diperuntukkan selainnya dalam Akta ini dan dalam Kaedah-Kaedah dan Peraturan-Peraturan Polis yang dibuat di bawahnya, tiap-tiap pegawai polis hendaklah melainkan dikecualikan dengan nyata, tertakluk kepada peruntukan-peruntukan yang sama seperti yang terpakai kepada pegawai-pegawai awam yang lain yang mempunyai taraf bersamaan dalam perkhidmatan Kerajaan Malaysia.

BAHAGIAN VII

TUGAS-TUGAS DAN KUASA-KUASA PEGAWAI POLIS

19. Pegawai polis hendaklah disifatkan sebagai bertugas.

Tiap-tiap pegawai polis, pegawai polis tambahan dan konstabel penjaga, bagi maksud-maksud Akta ini, hendaklah disifatkan sebagai sentiasa bertugas apabila dikehendaki bertindak sebagai demikian dan hendaklah melaksanakan tugas-tugas dan menjalankan kuasa-kuasa yang diberi kepadanya di bawah mana-mana undang-undang lain di mana-mana tempat dalam Malaysia di mana dia mungkin menjalankan tugas.

20. Tugas-tugas am pegawai polis.

(1) Tiap-tiap pegawai polis hendaklah melaksanakan tugas-tugas dan menjalankan kuasa-kuasa yang dipertanggungjawabkan atau diberikan oleh undang-undang ke atas atau kepada seorang pegawai polis, dan hendaklah mematuhi semua arahan yang sah berkenaan dengan pelaksanaan jawatannya yang mungkin diterimanya dari semasa ke semasa daripada pegawai atasannya dalam Pasukan.

(2) Jika sesuatu tugas, kuasa atau budi bicara dipertanggungjawabkan atau diberi oleh atau di bawah Akta ini atau mana-mana undang-undang lain ke atas atau kepada seorang pegawai polis daripada apa-apa pangkat tertentu atau yang memegang apa-apa jawatan tertentu, pegawai polis itu hendaklah,

dalam melaksanakan tugas itu atau menjalankan kuasa-kuasa atau budi bicara itu, tertakluk kepada perintah dan arahan mana-mana pegawai polis yang di bawahnya dia bertugas secara langsung, dan mana-mana pegawai polis yang kemudian tersebut itu, jika keadaan memerlukan dan didapatinya bermanfaat untuk berbuat demikian, hendaklah sendirinya melaksanakan tugas itu atau menjalankan kuasa atau budi bicara itu.

(3) Tanpa menjejaskan keluasan peruntukan-peruntukan yang tersebut di atas atau mana-mana undang-undang lain adalah menjadi tugas seorang pegawai polis melaksanakan maksud-maksud yang tersebut dalam subseksyen (3) seksyen 3; dan dia boleh mengambil langkah-langkah yang sah dan melakukan perbuatan-perbuatan yang sah yang perlu berkaitan dengannya, termasuk—

- (a) menangkap semua orang yang dia diberi kuasa oleh undang-undang menangkap;
- (b) memproses risikan keselamatan;
- (c) menjalankan pendakwaan;
- (d) memberi bantuan dalam melaksanakan mana-mana undang-undang berhubungan dengan hasil, eksais, kebersihan, kuarantin, imigresen dan pendaftaran;
- (e) memberi bantuan dalam mengekalkan ketenteraman di pelabuhan dan lapangan terbang Malaysia, dan dalam menguatkuasakan peraturan-peraturan kelautan dan pelabuhan;
- (f) melaksanakan saman, sepina, waran, perintah memenjara dan proses-proses lain yang dikeluarkan dengan sah oleh mana-mana pihak berkuasa yang kompeten;
- (g) mempamerkan maklumat;
- (h) melindungi harta yang tidak dituntut dan yang hilang dan mencari pemunya;
- (i) menyita binatang-binatang yang berkeliaran dan menempatkannya dalam kandang awam;

- (j) memberi bantuan dalam melindungi nyawa dan harta;
- (k) melindungi harta awam daripada hilang atau rosak;
- (l) menghadiri mahkamah jenayah dan, jika diperintah dengan khas, mahkamah sivil, dan menjaga ketenteraman di dalamnya; dan
- (m) mengiring dan menjaga banduan-banduan dan orang-orang lain yang ada dalam jagaan polis.

(4) Seorang pegawai polis semasa melaksanakan tugas-tugas yang tersebut dalam perenggan (m) subseksyen (3) hendaklah disifatkan sebagai seorang pegawai penjara, dan hendaklah mempunyai semua kuasa, perlindungan dan keistimewaan yang ada pada seorang pegawai penjara.

21. Tugas di jalan awam.

-) Adalah menjadi tugas pegawai-pegawai polis—
 - (a) mengatur, mengawal dan melencongkan mana-mana lalulintas;
 - (b) menjaga ketenteraman di jalan awam, lorong, jalan tembus dan tempat mendarat, dan tempat kunjungan awam yang lain dan tempat di mana orang awam ada akses; dan
 - (c) mencegah halangan pada waktu perhimpunan dan perarakan di jalan awam dan lorong, dan dalam mana-mana hal, bila mana-mana jalan, lorong, jalan tembus dan tempat mendarat atau feri mungkin penuh sesak atau menjadi terhalang.

(2) Seseorang yang menghalang, membangkang atau ingkar menurut apa-apa arahan yang munasabah yang diberi oleh mana-mana pegawai polis dalam melaksanakan tugas-tugasnya di bawah seksyen ini, adalah melakukan suatu kesalahan dan apabila disabitkan boleh dikenakan denda tidak melebihi dua ratus ringgit atau hukuman penjara selama tempoh tidak melebihi tiga bulan atau kedua-duanya.

(3) Seseorang yang melakukan suatu kesalahan di bawah seksyen ini boleh ditangkap tanpa waran melainkan dia memberi kepada pegawai polis itu nama dan alamatnya dan selainnya memuaskan hati pegawai polis itu yang dia akan mematuhi dengan sewajarnya apa-apa saman atau prosiding lain yang mungkin diambil terhadapnya.

22. Harta yang tidak dituntut.

(1) Tertakluk kepada subseksyen (2), adalah menjadi tugas tiap-tiap pegawai polis untuk menjaga harta alih yang tidak dituntut yang diberikan oleh mana-mana orang kepadanya, atau yang dijumpai olehnya; dan dia hendaklah menyerahkan harta itu kepada pegawai yang menjaga balai polis yang berhampiran sekali, yang mana hendaklah menyebabkan ditampal di suatu tempat yang mudah dilihat di balai polis itu suatu notis menyatakan harta itu dan meminta sesiapa yang mungkin ada apa-apa tuntutan ke atasnya dalam tempoh dua bulan dari tarikh notis itu supaya hadir dan membuktikan tuntutannya.

(2) Jika harta yang tersebut dahulu adalah daripada jenis mudah musnah, pegawai yang menjaganya boleh menyebabkan harta itu dijual dengan segera dan hendaklah menghantar kepada Pegawai Penjaga Daerah Polis hasil jualan itu; dan hasil jualan itu hendaklah, selepas ditolak apa-apa perbelanjaan yang semunasabahnya ditanggung, dibayar kepada orang yang, dalam tempoh yang dinyatakan dalam subseksyen (1) membuktikan tuntutannya ke atasnya.

(3) Mana-mana harta yang tersebut dahulu, yang tidak dituntut dalam tempoh yang dinyatakan dalam subseksyen (1) boleh dijual atau, secara lain dilupuskan atau dimusnahkan mengikut cara yang diarahkan oleh Pegawai Memerintah; dan keuntungan daripada apa-apa jualan harta itu hendaklah, selepas ditolak apa-apa perbelanjaan yang semunasabahnya ditanggung dalam jualan itu, dibahagikan secara berikut—

(a) apa-apa bahagian yang diarahkan oleh Pegawai Memerintah boleh dibayar kepada orang yang menjumpai harta itu;

(b) lima puluh ringgit yang pertama daripada bakinya, jika ada, hendaklah dibayar kepada Kumpulan Wang Polis yang ditubuhkan di bawah Bahagian XIII dan selebihnya hendaklah dibayar kepada hasil am Malaysia.

(4) Tiada seorang pun pegawai polis atau pegawai polis tambahan boleh membeli mana-mana harta yang dijual di bawah seksyen ini; dan mana-mana pegawai polis atau pegawai polis tambahan yang melanggar subseksyen ini adalah melakukan suatu kesalahan terhadap disiplin.

23. Estet yang tidak dituntut.

(1) Apabila seseorang mati dengan meninggalkan dalam Malaysia harta alih yang oleh sebab tiadanya seseorang yang berhak kepadanya atau tiadanya apa-apa tuntutan ke atas harta itu bagi maksud pentadbiran, diambil oleh pegawai polis ke dalam jagaannya bagi maksud simpanan selamat, Pegawai Memerintah hendaklah segera memberitahu Pegawai Pentadbir Pusaka, Pegawai Probet atau Pentadbir dalam Negeri di mana harta itu terletak bahawa harta itu adalah dalam jagaannya; dan sementara menunggu arahan-arahan Pegawai Pentadbir Pusaka, Pegawai Probet atau Pentadbir itu, Pegawai Memerintah hendaklah menyimpan harta itu dengan selamat.

(2) Berkenaan dengan hal harta dari jenis mudah musnah atau yang mungkin akan merosot nilainya, seorang Pegawai Memerintah atau mana-mana pegawai yang diberi kuasa olehnya secara bertulis boleh memerintahkannya dijual dan keuntungan jualan itu hendaklah diberikan kepada Pegawai Pentadbir Pusaka, Pegawai Probet atau Pentadbir.

24. Kuasa pegawai polis untuk memeriksa lesen, kenderaan, dll.

(1) Mana-mana pegawai polis boleh—

(a) memberhentikan dan menahan mana-mana orang—

(i) yang dilihatnya sedang melakukan apa-apa perbuatan atau ada dalam miliknya apa-apa benda; atau

(ii) yang dia ada alasan-alasan yang munasabah bagi mengesyaki sedang melakukan apa-apa perbuatan atau ada dalam miliknya apa-apa benda;

yang baginya lesen, permit atau kebenaran adalah diperlukan di bawah mana-mana undang-undang yang berkuatkuasa, bagi maksud menghendaki orang itu mengemukakan lesen, permit atau kebenaran itu;

(b) memberhenti dan memeriksa tanpa waran mana-mana kenderaan atau vesel yang disyaknya atas alasan-alasan yang munasabah sedang digunakan dalam melakukan apa-apa kesalahan terhadap mana-mana undang-undang yang berkuatkuasa:

Dengan syarat bahawa kenderaan atau vesel itu tidak boleh, tertakluk kepada subseksyen (4), ditahan lebih lama daripada semunasabahnya perlu untuk menyempurnakan pemeriksaan itu.

(2) Seseorang yang tidak mengemukakan lesen, permit atau kebenaran, di bawah subseksyen (1) (a) apabila diminta berbuat demikian oleh seorang pegawai polis boleh ditangkap tanpa waran melainkan dia memberi kepada pegawai polis itu nama dan alamatnya dan, selainnya, memuaskan hati pegawai polis itu yang dia akan mematuhi dengan sewajarnya apa-apa saman atau prosiding lain yang mungkin diambil terhadapnya.

(3) Seseorang yang tidak mematuhi apa-apa isyarat munasabah yang diberikan oleh seorang pegawai polis, menghendaki mana-mana orang memberhentikan apa-apa kenderaan atau vesel di bawah subseksyen (1) atau menghalang mana-mana pegawai polis dalam melaksanakan tugasnya di bawah subseksyen itu, adalah melakukan suatu kesalahan di bawah Akta ini, dan mana-mana pegawai polis boleh tanpa waran, menangkap orang itu melainkan dia memberi nama dan alamatnya dan, selainnya, memuaskan hati pegawai polis yang dia akan mematuhi dengan sewajarnya apa-apa saman atau prosiding lain yang mungkin diambil terhadapnya.

(4) Mana-mana pegawai polis boleh menyebabkan mana-mana kenderaan atau vesel, yang dia ada alasan-alasan yang

munasabah untuk mengesyaki telah digunakan dalam melakukan suatu kesalahan terhadap mana-mana undang-undang yang berkuatkuasa atau sebagai keterangan mengenai apa-apa kesalahan yang telah dilakukan, dipindahkan ke ibu pejabat Daerah Polis yang berhampiran sekali atau ke tempat lain yang sesuai, dan Pegawai Penjaga Daerah Polis itu boleh dengan itu menyebabkan kenderaan atau vesel itu ditahan di situ, sementara menunggu penyiasatan, bagi tempoh tidak melebihi empat puluh lapan jam, atau jika, dalam tempoh itu, prosiding dimulakan mengenai apa-apa kesalahan di mana kenderaan atau vesel itu boleh dilucuthakkan di bawah mana-mana undang-undang atau boleh dengan sewajarnya dikemukakan sebagai keterangan, sehingga keputusan muktamad prosiding itu:

Dengan syarat bahawa Pegawai Penjaga Daerah Polis itu boleh, walau apa pun subseksyen ini, mengarahkan supaya kenderaan atau vesel itu dilepaskan jika dia berpuas hati bahawa pemunya atau orang yang menjaga kenderaan atau vesel itu akan mengemukakan kenderaan atau vesel itu dengan sewajarnya di hadapan mahkamah apabila dikehendaki, dan bagi maksud itu boleh menghendaki pemunya atau orang itu menyempurnakan suatu bon atau mendepositkan apa-apa sekuriti yang difikirkannya munasabah.

25. Kuasa untuk menahan dan memeriksa pesawat udara.

(1) Tertakluk kepada subseksyen (2), mana-mana pegawai kanan polis boleh, di mana-mana lapangan terbang atau di mana-mana tempat lain dalam Malaysia, menahan dan tanpa waran memeriksa mana-mana pesawat udara (yang bukannya pesawat udara yang dipunyai oleh, atau digunakan secara eksklusif dalam perkhidmatan, Kerajaan atau Kerajaan mana-mana Negeri asing); dan mengenai mana-mana pesawat udara tersebut yang sedang bergerak di mana-mana lapangan terbang atau di mana-mana tempat lain dalam, atau sedang dalam penerbangan di angkasa, Malaysia, seorang pegawai kanan polis boleh, tertakluk seperti tersebut dahulu, memerintah pesawat udara itu berhenti atau mendarat di mana-mana lapangan terbang atau di mana-mana tempat lain yang dinyatakan olehnya.

(2) Kuasa yang diberi kepada pegawai kanan polis di bawah subseksyen (1) tidak boleh dijalankan olehnya kecuali—

(a) di mana dia ada alasan-alasan yang munasabah bagi mempercayai bahawa pesawat udara yang tersebut dalam subseksyen itu sedang atau telah digunakan dalam melakukan sesuatu kesalahan yang boleh ditangkap; atau

(b) bagi maksud menangkap seseorang yang semunasabahnya disyaki telah melakukan suatu kesalahan yang boleh ditangkap.

(3) Apa-apa perintah supaya berhenti atau mendarat yang diberi di bawah subseksyen (1) hendaklah dipancarkan ke pesawat udara oleh pegawai yang sedang menjaga kawalan trafik udara; tetapi tiada sesuatu pesawat udara boleh diperintah mendarat di mana-mana lapangan terbang atau di mana-mana tempat lain yang, pada pendapat pegawai yang sedang menjaga kawalan trafik udara, tidak selamat untuk digunakan oleh pesawat udara itu.

(4) Seksyen 24 berhubungan dengan menggerakkan, menahan dan melepaskan mana-mana kenderaan dan vesel yang ditahan di bawah seksyen ini adalah terpakai bagi sesuatu pesawat udara yang ditahan di bawah seksyen ini seolah-olah rujukan di dalamnya—

(a) kepada mana-mana pegawai polis hendaklah ditafsirkan sebagai rujukan kepada seorang pegawai kanan polis;

(b) kepada ibu pejabat Daerah Polis yang berhampiran sekali atau kepada mana-mana Pegawai Penjaga Daerah Polis itu hendaklah ditafsirkan sebagai rujukan kepada lapangan terbang yang berhampiran sekali dan kepada Pegawai Penjaga Daerah Polis di mana lapangan terbang itu terletak.

(5) Seseorang yang tidak, tanpa sebab yang munasabah, mematuhi sesuatu perintah yang diberi di bawah subseksyen (1) adalah melakukan suatu kesalahan di bawah Akta ini.

26. Kuasa untuk mendirikan sekatan-sekatan jalan.

(1) Walau apa pun yang terkandung dalam mana-mana undang-undang lain, mana-mana pegawai polis boleh, jika difikirkannya perlu untuk berbuat demikian bagi memelihara dan mengekalkan undang-undang dan ketenteraman atau untuk mencegah atau mengesan jenayah, mendirikan atau meletakkan atau menyebabkan didirikan atau diletakkan apa-apa sekatan-sekatan di atas atau melintang mana-mana jalan awam atau lorong atau di mana-mana tempat awam dengan apa-apa cara yang difikirkannya patut; dan mana-mana pegawai polis boleh mengambil semua langkah yang munasabah untuk mencegah mana-mana orang daripada melalui atau mana-mana kenderaan daripada merempuh lalu mana-mana sekatan itu.

(2) Seseorang yang tidak mematuhi apa-apa isyarat yang munasabah yang diberi oleh seorang pegawai polis yang menghendaki orang atau kenderaan itu berhenti sebelum sampai mana-mana sekatan itu adalah melakukan suatu kesalahan dan apabila disabitkan boleh dikenakan hukuman penjara selama tempoh tidak melebihi dua belas bulan atau denda tidak melebihi satu ribu ringgit atau kedua-duanya; dan mana-mana pegawai polis boleh, tanpa waran, menangkap orang itu melainkan dia memberi nama dan alamatnya dan, selainnya, memuaskan hati pegawai polis yang dia akan mematuhi dengan sewajarnya apa-apa saman atau prosiding lain yang mungkin diambil terhadapnya.

(3) Tiada seorang pun pegawai polis boleh bertanggungjawab terhadap apa-apa kerugian, kecederaan atau kerosakan yang berlaku ke atas mana-mana orang atau apa-apa harta berbangkit daripada langkah-langkah yang diambil olehnya yang tersebut dalam subseksyen (1).

27. Kuasa untuk mengawalselia perhimpunan, perjumpaan dan perarakan.

(1) Mana-mana Pegawai Penjaga Daerah Polis atau mana-mana pegawai polis yang diberi kuasa dengan sewajarnya secara

bertulis olehnya boleh mengarahkan, dengan apa-apa cara yang difikirkannya patut, perjalanan di tempat-tempat awam dalam Daerah Polis itu semua perhimpunan, perjumpaan dan perarakan, orang atau kenderaan dan boleh menetapkan jalan manakah, dan waktu bilakah, perhimpunan atau perjumpaan itu boleh diadakan atau perarakan itu boleh lalu.

(2) Mana-mana orang yang berniat mengadakan atau mengumpulkan mana-mana perhimpunan atau perjumpaan atau membentuk suatu perarakan di mana-mana tempat awam yang tersebut dahulu, hendaklah sebelum mengadakan, mengumpulkan atau membentuk perhimpunan, perjumpaan atau perarakan itu, membuat kepada Pegawai Penjaga Daerah Polis di mana perhimpunan, perjumpaan atau perarakan itu akan diadakan suatu permohonan untuk mendapatkan lesen bagi maksud itu, dan jika pegawai polis itu berpuas hati bahawa perhimpunan, perjumpaan atau perarakan itu tidak mungkin memudaratkan kepentingan keselamatan Malaysia atau mana-mana bahagiannya atau membangkitkan kekacauan keamanan, dia hendaklah mengeluarkan suatu lesen dalam bentuk yang ditetapkan dengan menyatakan nama pemegang lesen itu dan menerangkan syarat-syarat atas mana perhimpunan, perjumpaan atau perarakan itu dibenarkan:

Dengan syarat bahawa pegawai polis itu boleh pada bila-bila masa membatalkan lesen itu atas apa-apa alasan yang membolehkan lesen tidak dikeluarkan di bawah subseksyen ini.

(2A) Sesuatu permohonan untuk mendapatkan lesen di bawah subseksyen (2) hendaklah dibuat oleh suatu pertubuhan atau bersesama oleh tiga orang individu. [Mas. Akta
A685]

(2B) Jika sesuatu permohonan dibuat bersesama oleh tiga orang individu, maka pegawai polis yang kepadanya permohonan dibuat hendaklah menolak permohonan itu kiranya dia berpuas hati bahawa perhimpunan, perjumpaan atau perarakan yang baginya lesen dipohonkan itu adalah pada hakikat sebenarnya dimaksudkan untuk diadakan, dikumpulkan atau dibentuk oleh sesuatu pertubuhan. [Mas. Akta
A685]

[Mas. Akta
A685]

(2C) Jika sesuatu permohonan dibuat bersesama oleh tiga orang individu, maka pegawai polis yang mengeluarkan lesen hendaklah menyatakan dalam lesen itu nama orang-orang itu sebagai pemegang lesen.

[Mas. Akta
A685]

(2D) Tiada lesen boleh dikeluarkan di bawah subseksyen (2) atas permohonan suatu pertubuhan yang tidak didaftarkan atau selainnya diiktirafkan di bawah mana-mana undang-undang yang berkuatkuasa di Malaysia.

(3) Mana-mana pegawai polis boleh menghentikan mana-mana perhimpunan, perjumpaan atau perarakan yang mengenainya lesen telah tidak dikeluarkan atau setelah dikeluarkan telah kemudiannya dibatalkan di bawah subseksyen (2) atau yang melanggar mana-mana daripada syarat-syarat sesuatu lesen yang telah dikeluarkan mengenainya di bawah subseksyen tersebut; dan mana-mana pegawai polis boleh memerintahkan orang-orang dalam perhimpunan, perjumpaan atau perarakan itu bersurai.

[Pind. Akta
A685]

(4) Mana-mana orang yang tak mematuhi apa-apa perintah yang diberikan di bawah subseksyen (1) atau subseksyen (3) adalah melakukan suatu kesalahan.

[Mas. Akta
A685]

(4A) Jika mana-mana syarat lesen yang dikeluarkan di bawah subseksyen (2) dilanggar, maka pemegang-pemegang lesen adalah melakukan suatu kesalahan.

(5) Apa-apa perhimpunan, perjumpaan atau perarakan—

(a) yang berlaku tanpa lesen yang dikeluarkan di bawah subseksyen (2); atau

(b) di mana tiga orang atau lebih yang mengambil bahagian mengabai atau enggan menurut apa-apa perintah yang diberi di bawah subseksyen (1) atau subseksyen (3);

[Pind. Akta
A685]

hendaklah disifatkan sebagai suatu perhimpunan haram, dan semua orang yang hadir, dijumpai di atau mengambil bahagian dalam perhimpunan, perjumpaan atau perarakan itu dan, berkenaan dengan perhimpunan, perjumpaan dan perarakan yang

tiada lesen telah dikeluarkan baginya, semua orang yang hadir, dijumpai di atau mengambil bahagian dalam atau bersangkut-paut dengan mengadakan, mengumpul atau mengarah perhimpunan, perjumpaan atau perarakan itu, adalah melakukan suatu kesalahan.

(5A) Dalam apa-apa pendakwaan bagi suatu kesalahan di bawah subseksyen (5) kerana menghadiri, dijumpai di atau mengambil bahagian dalam suatu perhimpunan, perjumpaan atau perarakan yang merupakan suatu perhimpunan haram, maka tidaklah menjadi suatu pembelaan bahawa orang yang dipertuduh itu tidak tahu yang perhimpunan, perjumpaan atau perarakan itu adalah suatu perhimpunan haram ataupun tidak tahu akan fakta-fakta atau hal-hal keadaan yang menjadikan perhimpunan, perjumpaan atau perarakan itu suatu perhimpunan haram. [Mas. Akta
A685]

(5B) Dalam apa-apa pendakwaan bagi suatu kesalahan di bawah subseksyen (5) kerana menghadiri atau dijumpai di suatu perhimpunan, perjumpaan atau perarakan yang merupakan suatu perhimpunan haram, adalah menjadi suatu pembelaan bahawa kehadiran orang yang dipertuduh itu berlaku disebabkan hal keadaan ikhlas dan bahawa dia tidak ada niat sebaliknya untuk bersekutu dengan perhimpunan, perjumpaan atau perarakan itu. [Mas. Akta
A685]

(5C) Bagi maksud-maksud subseksyen (5), jika ternyata daripada segala hal keadaan yang berhubungan dengan suatu perhimpunan, perjumpaan atau perarakan bahawa ia telah diadakan, dikumpulkan atau diarahkan oleh atau dengan penglibatan, penyertaan, bantuan, galakan, sokongan atau pembiaran sesuatu pertubuhan, maka tiap-tiap anggota badan pengelola bagi pertubuhan itu hendaklah disifatkan telah mengambil bahagian dalam atau bersangkut-paut dengan mengadakan, mengumpul atau mengarahkan perhimpunan, perjumpaan atau perarakan itu melainkan jika dia membuktikan bahawa dia tidak tahu ataupun tidak mempunyai apa-apa sebab bagi mempercayai atau mengesyaki bahawa perhimpunan, perjumpaan atau perarakan itu hendak diadakan atau, jika ia tahu ataupun mempunyai sebab bagi mempercayai atau mengesyaki seperti yang tersebut dahulu, dia telah mengambil segala langkah [Mas. Akta
A685]

yang munasabah untuk mencegah daripada diadakan perhimpunan, perjumpaan atau perarakan itu atau, jika bukanlah dengan munasabah dalam kuasanya untuk mencegah sedemikian, dia telah secara terbuka membantah atau memisahkan dirinya dari usaha mengadakan, mengumpulkan atau mengarahkan perhimpunan, perjumpaan atau perarakan itu.

(6) Mana-mana pegawai polis boleh, tanpa waran, menangkap seseorang yang semunasabahnya disyaki melakukan apa-apa kesalahan di bawah seksyen ini.

(7) Mana-mana orang yang terkilan dengan keengganan Pegawai Penjaga Daerah Polis mengeluarkan lesen di bawah subseksyen (2) boleh dalam tempoh empat puluh lapan jam dari keengganan itu merayu secara bertulis kepada Pesuruhjaya atau Ketua Pegawai Polis; dan keputusan Pesuruhjaya atau Ketua Pegawai Polis tersebut mengenainya adalah muktamad.

[Pind. Akta
A685]

(8) Mana-mana orang yang melakukan suatu kesalahan di bawah seksyen ini boleh apabila disabitkan dikenakan denda tidak kurang daripada dua ribu ringgit tetapi tidak lebih daripada sepuluh ribu ringgit dan hukuman penjara selama tempoh tidak melebihi satu tahun.

[Mas. Akta
A685]

(8A) Seksyen 173A dan 294 Kanun Prosedur Jenayah tidaklah terpakai berkenaan dengan sesuatu kesalahan di bawah seksyen ini.

[Mas. Akta
A685]

27A. Kuasa untuk menghentikan aktiviti-aktiviti tertentu yang diadakan di tempat selain daripada di suatu tempat awam.

(1) Jika apa-apa aktiviti berlangsung di atas atau di dalam mana-mana tanah atau premis yang tidak merupakan suatu tempat awam dan—

(a) aktiviti itu ditujukan kepada, atau dimaksud untuk disaksikan atau didengar atau disertai oleh, orang-orang di luar tanah atau premis itu, atau dari segala hal keadaan ia dapat difahamkan sebagai ditujukan atau dimaksudkan sedemikian; atau

- (b) aktiviti itu menarik kehadiran dua puluh orang atau lebih di luar tanah atau premis itu; atau
- (c) aktiviti itu mungkin memudaratkan kepentingan keselamatan Malaysia atau mana-mana bahagiannya atau membangkitkan kekacauan keamanan,

maka mana-mana pegawai polis boleh memerintahkan orang-orang yang terlibat dalam aktiviti itu menghentikan aktiviti itu dan boleh memerintahkan semua orang yang dijumpa di atas atau di dalam atau di luar tanah atau premis itu bersurai.

(2) Mana-mana orang yang tak mematuhi mana-mana perintah yang diberikan di bawah subseksyen (1) adalah melakukan suatu kesalahan.

(3) Jika tiga orang atau lebih abai atau enggan mematuhi mana-mana perintah yang diberikan di bawah subseksyen (1), maka aktiviti yang berkenaan itu hendaklah disifatkan sebagai suatu aktiviti haram, dan semua orang yang mengambil bahagian dalam atau bersangkutan-paut dengan aktiviti itu, atau yang mengambil bahagian dalam atau bersangkutan-paut dengan usaha mengelolakan atau mengarahkan aktiviti itu, adalah melakukan suatu kesalahan.

(4) Bagi maksud-maksud subseksyen (3), jika ternyata daripada segala hal keadaan yang berhubungan dengan suatu aktiviti bahawa aktiviti itu telah dikelolakan atau diarahkan oleh atau dengan penglibatan, penyertaan, bantuan, galakan, sokongan atau pembiaran sesuatu pertubuhan, maka tiap-tiap anggota badan pengelola bagi pertubuhan itu hendaklah disifatkan telah mengambil bahagian dalam atau bersangkutan-paut dengan mengelolakan atau mengarahkan aktiviti itu melainkan jika dia membuktikan bahawa dia tidak tahu ataupun tidak mempunyai apa-apa sebab bagi mempercayai atau mengesyaki bahawa aktiviti itu hendak diadakan atau, jika dia tahu atau mempunyai sebab bagi mempercayai atau mengesyaki seperti yang tersebut dahulu, dia telah mengambil segala langkah yang munasabah untuk mencegah daripada diadakan aktiviti itu atau, jika bukanlah dengan munasabah dalam kuasanya untuk mencegah

sedemikian, dia telah secara terbuka membantah atau memisahkan dirinya dari usaha mengelolakan atau mengarahkan aktiviti itu.

(5) Mana-mana pegawai polis boleh, tanpa waran, menangkap mana-mana orang yang semunasabahnya disyaki melakukan apa-apa kesalahan di bawah seksyen ini.

(6) Mana-mana orang yang melakukan suatu kesalahan di bawah seksyen ini boleh apabila disabitkan dikenakan denda tidak kurang daripada dua ribu ringgit tetapi tidak lebih daripada sepuluh ribu ringgit dan penjara selama tempoh tidak melebihi satu tahun.

(7) Seksyen 173A dan 294 Kanun Prosedur Jenayah tidaklah terpakai berkenaan dengan sesuatu kesalahan di bawah seksyen ini.

[Mas. Akta
A685]

27B. Penggunaan kekerasan dalam menyuraikan atau menangkap orang-orang menurut seksyen 27 atau 27A.

Jika orang-orang diperintahkan supaya bersurai menurut seksyen 27 (3) atau 27A (1) dan tidak bersurai, maka mana-mana pegawai polis atau mana-mana orang lain yang bertindak bagi membantu seseorang pegawai polis boleh melakukan segala perkara yang perlu untuk menyuraikan mereka dan untuk menangkap mereka atau mana-mana antara mereka menurut seksyen 27 (6) atau 27A (5), dan, jika mana-mana orang memberi tentangan, boleh menggunakan kekerasan yang semunasabahnya perlu untuk mengatasi tentangan itu.

[Mas. Akta
A685]

27C. Keizinan untuk mendakwa kesalahan-kesalahan di bawah seksyen 27 atau 27A.

(1) Sesuatu pendakwaan bagi suatu kesalahan di bawah seksyen 27 atau 27A tidaklah boleh dimulakan kecuali dengan izin bertulis Pendakwa Raya, tetapi seseorang yang akan dipertuduh atas kesalahan itu boleh ditangkap, atau suatu waran untuk menangkapnya boleh dikeluarkan dan dilaksanakan, dan dia boleh ditahan dalam jagaan atau dilepaskan dengan ikat

jamin, walaupun izin Pendakwa Raya berkenaan dengan permulaan pendakwaan bagi kesalahan itu belum lagi didapati, tetapi kes itu tidaklah boleh didakwa seterusnya sehingga izin telah didapati.

(2) Apabila seseorang dibawa ke hadapan mahkamah atas suatu pertuduhan di bawah seksyen 27 atau 27A sebelum Pendakwa Raya telah mengizinkan pendakwaan itu; pertuduhan itu hendaklah dibaca dan diterangkan kepadanya tetapi dia tidaklah boleh diminta mengaku atas pertuduhan itu, dan Kanun Prosedur Jenayah hendaklah diubahsuai sewajarnya.

28. Kuasa untuk mengawalselia permainan muzik di tempat awam.

Mana-mana Pegawai Penjaga Daerah Polis atau seorang pegawai kanan polis dalam Daerah itu boleh, dengan apa-apa cara yang difikirkannya patut, mengawalselia setakat manakah alat-alat muzik boleh dimainkan di tempat-tempat awam dalam Daerah Polis itu.

29. Kuasa untuk membuat kaedah-kaedah dan perintah-perintah bagi mengawal lalulintas.

(1) Seorang Pesuruhjaya atau seorang Ketua Pegawai Polis boleh berkenaan dengan suatu Negeri, dengan kelulusan Menteri Besar atau Ketua Menteri Negeri tersebut, mengikut mana yang berkenaan, membuat kaedah-kaedah bagi—

(a) menjaga ketenteraman dan mencegah halangan atau kesulitan di jalan awam, lorong, jalan tembus, tempat mendarat dan feri dan di tempat awam dan di tempat kunjungan awam (sama ada tempat-tempat itu di atas tanah Kerajaan atau selainnya);

(b) melarang digunakan jalan awam, lorong, jalan tembus, tempat mendarat dan feri yang tertentu sama ada dengan mutlak atau bersyarat.

(2) Seorang Pesuruhjaya atau seorang Ketua Pegawai Polis boleh membuat perintah menetapkan jalan-jalan yang

dikehendaki dilalui oleh kenderaan bagi maksud menurunkan atau mengambil naik orang-orang, hingga dan apabila meninggalkan mana-mana tempat mendarat, feri atau tempat perhimpunan atau tempat kunjungan awam, dan tempat-tempat di mana dan tertib bagaimana kenderaan itu dikehendaki menunggu bagi maksud yang tersebut dahulu:

Dengan syarat bahawa tiada sesuatu perintah yang menghendaki kenderaan diletakkan di atas tanah kepunyaan pihak persendirian di bawah subseksyen ini boleh dibuat kecuali dengan keizinan pemunya atau penduduk tanah itu.

(3) Maka bolehlah dikenakan bagi pelanggaran apa-apa kaedah atau perintah yang tersebut dahulu suatu penalti tidak melebihi dua ratus ringgit.

30. Kuasa untuk membuat perintah-perintah bagi mengawal penunjukan bendera-bendera, dll.

(1) Seorang Pesuruhjaya atau Ketua Pegawai Polis boleh, dengan perintah, secara amnya atau berkenaan dengan waktu-waktu atau tempat-tempat tertentu atau dalam hal keadaan tertentu, melarang dalam Negeri itu—

- (a) dikibarkan, dipamerkan atau ditunjukkan apa-apa bendera, panji-panji, lambang atau plakad atau lambang lain;
- (b) digunakan apa-apa pembesar suara, penguatsuaranya atau apa-apa perkakas lain;

dengan cara yang mungkin membangkitkan kekacauan keamanan; dan mana-mana pegawai polis boleh membuang apa-apa bendera, panji-panji, lambang, plakad atau lambang lain atau mana-mana pembesar suara, penguatsuaranya, atau perkakas lain yang dikibarkan, dipamerkan, ditunjukkan atau digunakan dengan melanggar perintah tersebut atau dalam hal keadaan yang mungkin membangkitkan kekacauan keamanan.

(2) Seseorang yang melanggar sesuatu perintah yang dibuat di bawah subseksyen (1) adalah melakukan suatu kesalahan di bawah Akta ini.

31. Kuasa untuk membuat perintah-perintah bagi menghendaki orang-orang berada dalam rumah.

(1) Seorang Pesuruhjaya atau seorang Ketua Pegawai Polis boleh, jika difikirkannya perlu untuk kepentingan keselamatan Malaysia atau keselamatan mana-mana bahagiannya atau untuk kepentingan ketenteraman awam, dengan perintah menghendaki, tertakluk kepada syarat-syarat atau pengecualian itu yang difikirkannya bermanfaat, tiap-tiap orang dalam kawasan bidang kuasanya yang ditetapkan dalam perintah itu supaya berada dalam rumah di antara waktu-waktu yang ditetapkan di dalamnya; dan Pesuruhjaya atau Ketua Pegawai Polis hendaklah dengan apa-apa cara yang difikirkannya patut membawa atau menyebabkan dibawa ke pengetahuan semua orang yang mungkin terlibat dengannya akan kandungan perintah itu.

(2) Seseorang yang berada di luar rumah dalam waktu-waktu yang dinyatakan dalam perintah itu adalah melakukan suatu kesalahan di bawah Akta ini melainkan orang itu memiliki suatu permit bertulis bagi maksud itu daripada—

- (a) Pesuruhjaya atau Ketua Pegawai Polis yang tersebut dahulu;
- (b) seorang pegawai polis berpangkat tidak rendah daripada Sub-Inspektor yang secara langsung di bawah perintah Pesuruhjaya atau Ketua Pegawai Polis yang tersebut dahulu; atau
- (c) seorang pegawai awam yang diberi kuasa secara bertulis oleh Pesuruhjaya atau Ketua Pegawai Polis yang tersebut dahulu untuk mengeluarkan permit-permit bertulis tersebut.

(3) Tiada apa-apa perintah di bawah subseksyen (1) terpakai kepada— [Pind. Akta
A354, A514]

- (a) Yang di-Pertuan Agong, Raja, Yang Dipertua Negeri;
- (b) mana-mana pegawai polis atau mana-mana anggota mana-mana angkatan laut, tentera atau udara yang ditubuhkan atau berkhidmat dalam Malaysia apabila bertugas; atau

(c) mana-mana orang atau golongan orang yang dinyatakan dalam perintah itu sebagai orang yang dikecualikan daripada perintah itu.

(4) Tiada apa-apa perintah yang dibuat di bawah subseksyen (1) boleh berkuatkuasa berterusan lebih daripada dua puluh empat jam dari masa ianya dibuat:

Dengan syarat bahawa Menteri, pada atau sebelum tamat tempoh perintah itu, boleh mengarahkan supaya perintah itu hendaklah berkuatkuasa seterusnya bagi apa-apa tempoh lanjutan tidak lebih daripada empat belas hari sebagaimana dinyatakan olehnya dan, apabila dibuat apa-apa arahan sedemikian, perintah itu hendaklah berkuatkuasa seterusnya bagi tempoh lanjutan itu.

(5) Subseksyen (1) berhubungan dengan memberi notis kandungan perintah yang dibuat di bawah subseksyen tersebut, adalah terpakai bagi arahan Menteri yang dibuat di bawah subseksyen (4).

32. Tiada liabiliti terhadap perbuatan yang dilakukan di bawah kuasa waran.

(1) Jika pembelaan kepada mana-mana guaman yang dibawa terhadap seorang pegawai polis, pegawai polis tambahan, pegawai polis sukarelawan simpanan atau seorang pegawai polis bantuan adalah bahawa perbuatan yang diadukan telah dilakukan pada menurut suatu waran yang berupa sebagai dikeluarkan oleh sesuatu pihak berkuasa yang kompeten, mahkamah hendaklah, apabila dikemukakan waran yang mengandungi tandatangan pihak berkuasa itu dan apabila dibuktikan bahawa perbuatan yang diadukan itu telah dilakukan pada menurut waran itu, mencatatkan hukuman memihak kepada pegawai polis, pegawai polis tambahan, pegawai polis sukarelawan simpanan atau pegawai polis bantuan itu.

(2) Tiada apa-apa bukti mengenai tandatangan pihak berkuasa itu dikehendaki melainkan mahkamah ada sebab bagi meragui ketulenannya; dan di mana dibuktikan bahawa tandatangan itu tidak tulen, hukuman hendaklah masih diberi memihak kepada

pegawai polis atau pegawai polis tambahan itu jika dibuktikan bahawa, pada waktu perbuatan yang diadukan itu dilakukan, dia percaya atas alasan-alasan yang munasabah bahawa tandatangan itu adalah tulen.

33. Pengecualian berkenaan dengan proses sivil.

(1) Tertakluk kepada subseksyen (2)—

- (a)* gaji dan elaun seorang pegawai rendah polis atau konstabel tidak boleh diserahkan atau dipindahmilik atau boleh ditahan, disekuestrasikan atau dilevi bagi, atau mengenai, apa-apa jua hutang atau tuntutan;
- (b)* tiada seorang pun pegawai rendah polis atau konstabel boleh dipenjarakan di bawah sesuatu perintah oleh mana-mana mahkamah atas sebab tidak membayar apa-apa hutang yang telah ditanggungnya atau mengenainya dia boleh bertanggung.

(2) Subseksyen (1) tidak terpakai bagi

- (a)* hutang yang kena dibayar kepada mana-mana Kerajaan dalam Malaysia;
- (b)* denda yang dikenakan di bawah mana-mana undang-undang;
- (c)* suatu perintah untuk membayar mas kahwin, alimoni atau nafkah yang dibuat bawah mana-mana undang-undang.

(3) Gaji dan elaun seorang pegawai rendah polis atau konstabel tidak boleh dipindahkan kepada Pegawai Pemegang Harta apabila pegawai polis itu bankrap, juga gaji dan elaun itu tidak boleh menjadi sebahagian daripada pusaknya bagi maksud-maksud mana-mana undang-undang yang berkuatkuasa dalam Malaysia berhubung dengan kebangkrapan.

BAHAGIAN VIII
SUKARELAWAN SIMPANAN POLIS DIRAJA
MALAYSIA

34. Penubuhan Sukarelawan Simpanan.

(1) Maka hendaklah ditubuhkan dalam dan bagi Malaysia suatu badan bernama Sukarelawan Simpanan Polis Diraja Malaysia (kemudian dari ini disebut “Sukarelawan Simpanan”) yang hendaklah terdiri daripada sebilangan pegawai kanan polis sukarelawan simpanan, pegawai rendah polis sukarelawan simpanan dan konstabel sukarelawan simpanan yang diizinkan oleh Yang di-Pertuan Agong dari semasa ke semasa.

(2) Bagi maksud Bahagian ini ungkapan “pegawai polis sukarelawan simpanan” ertinya mana-mana anggota Sukarelawan Simpanan.

35. Anggota-anggota Sukarelawan Simpanan.

Seseorang (bukan anggota Angkatan Tentera Malaysia atau mana-mana Pasukan yang ditubuhkan di bawah mana-mana undang-undang bertulis) yang berumur tidak rendah daripada lapan belas tahun atau lebih daripada lima puluh tahun, dan memiliki kelayakan-kelayakan yang ditetapkan boleh menawarkan diri dan diterima untuk lantikan dalam Sukarelawan Simpanan.

36. Perlantikan pegawai-pegawai polis sukarelawan simpanan, dll.

(1) Pegawai-pegawai kanan polis sukarelawan simpanan berpangkat Penolong Penguasa dan ke atas boleh dilantik, dinaikkan pangkat atau dibuang kerja oleh Ketua Polis Negara, dengan persetujuan Menteri, bagi pihak Yang di-Pertuan Agong.

(2) Pegawai-pegawai kanan polis sukarelawan simpanan berpangkat Ketua Inspektor dan ke bawah boleh dilantik, dinaikkan pangkat atau dibuang kerja oleh Ketua Polis Negara.

(3) Pegawai-pegawai rendah polis sukarelawan simpanan dan konstabel sukarelawan simpanan boleh dilantik, dinaikkan pangkat atau dibuang kerja oleh seorang Pegawai Memerintah.

(4) Perlantikan, kenaikan pangkat, perletakan jawatan, perlepasan atau pembuangan kerja tiap-tiap pegawai kanan polis sukarelawan simpanan yang berpangkat Penolong Penguasa atau ke atas hendaklah disiarkan dalam *Warta* Persekutuan.

37. Pangkat sukarelawan-sukarelawan yang dilantik dalam Sukarelawan Simpanan.

Orang-orang yang dilantik dalam Sukarelawan Simpanan boleh memegang pangkat pegawai-pegawai kanan polis sukarelawan simpanan, pegawai-pegawai rendah polis sukarelawan simpanan atau konstabel-konstabel sukarelawan simpanan, mengikut mana yang berkenaan, mengikut kelayakan-kelayakan mereka.

38. Pegawai-pegawai polis sukarelawan simpanan boleh dikehendaki meletakkan jawatan.

Seseorang pegawai polis sukarelawan simpanan boleh dikehendaki meletakkan jawatan oleh pihak berkuasa perlantikan jika pihak berkuasa itu berpendapat bahawa pegawai itu tidak, atas apa-apa sebab, berupaya menjalankan dengan cekap tugas-tugasnya yang dikehendaki atau mungkin dikehendaki untuk melaksanakan dengan cekap sebagai seorang anggota Sukarelawan Simpanan.

39. Akuan oleh pegawai polis sukarelawan simpanan.

Tiap-tiap pegawai polis sukarelawan simpanan hendaklah, sebelum mula menjalankan tugas-tugasnya, membuat di hadapan seorang pegawai kanan polis yang berpangkat tidak rendah daripada Penolong Penguasa, dengan apa-apa cara yang dia boleh akui sebagai paling berkesan pada perasaan hatinya, akuan yang diperuntukkan dalam Jadual Kedua.

40. Perakuan perlantikan.

Suatu perakuan perlantikan, dalam bentuk yang ditetapkan, hendaklah dikeluarkan kepada tiap-tiap pegawai polis sukarelawan simpanan dan hendaklah menjadi keterangan mengenai perlantikannya di bawah Akta ini.

41. Perletakan jawatan.

Seseorang pegawai polis sukarelawan simpanan boleh meletakkan jawatan dari Sukarelawan Simpanan dengan memberi satu bulan notis secara bertulis kepada seorang Pegawai Memerintah:

Dengan syarat bahawa jika Sukarelawan Simpanan atau mana-mana bahagiannya sedang dikerah, seorang pegawai polis sukarelawan simpanan tidak boleh meletakkan jawatan melainkan dibenarkan dengan nyata secara bertulis untuk berbuat demikian oleh seorang Pegawai Memerintah.

42. Gaji dan elaun.

(1) Tertakluk kepada subseksyen (2), seorang pegawai polis sukarelawan simpanan hendaklah berkhidmat dengan sukarela dan tidak berhak menuntut apa-apa saraan bagi perkhidmatannya, kecuali elaun-elaun yang ditetapkan.

(2) Apabila dikerah, seorang pegawai polis sukarelawan simpanan hendaklah menerima apa-apa gaji dan elaun yang ditetapkan bagi seorang pegawai polis yang bersamaan pangkat dan kekananan dalam pangkat itu.

43. Mengerah Sukarelawan Simpanan.

(1) Bagi apa-apa maksud berkenaan dengan keamanan dan ketenteraman di Malaysia atau mana-mana bahagian daripadanya Ketua Polis Negara boleh dengan terlebih dahulu mendapat kelulusan Menteri, mengerah Sukarelawan Simpanan atau mana-mana bahagian daripadanya untuk menjalankan tugas-tugas polis; dan pengerahan itu tidak boleh terhenti kuatkuasanya sehingga diperuntukkan selainnya dengan perintah yang dibuat

oleh Ketua Polis Negara dengan terlebih dahulu mendapat kelulusan Menteri.

(2) Tiap-tiap pegawai polis sukarelawan simpanan yang dikerah di bawah subseksyen (1) hendaklah berhimpun di mana-mana tempat yang diarahkan oleh Ketua Polis Negara.

(3) Seorang pegawai polis sukarelawan simpanan yang dikerah di bawah subseksyen (1) yang tanpa sebab yang munasabah, beban pembuktian hendaklah terletak dengannya, enggan atau abai berkhidmat adalah melakukan suatu kesalahan di bawah Akta ini.

44. Ketua Polis Negara boleh mengguna khidmat pegawai polis sukarelawan simpanan untuk menjalankan tugas-tugas polis.

Jika Sukarelawan Simpanan tidak dikerah, Ketua Polis Negara boleh mengguna khidmat seorang pegawai polis sukarelawan simpanan untuk menjalankan tugas-tugas polis sebagaimana diarahkan olehnya.

45. Kuasa pegawai polis sukarelawan simpanan.

Seseorang pegawai polis sukarelawan simpanan apabila melaksanakan tugas-tugas polis hendaklah mempunyai kuasa-kuasa dan tugas-tugas yang sama dan perlindungan dan imuniti yang sama dan hendaklah tertakluk kepada pihak berkuasa dan disiplin yang sama seperti pegawai polis yang bersamaan pangkat dengannya.

46. Menempatkan semula dalam pekerjaan sivilian.

(1) Adalah menjadi kewajipan majikan yang telah mengambil kerja mana-mana pegawai polis sukarelawan simpanan selama tempoh sekurang-kurangnya tiga bulan sebelum sahaja tarikh pegawai itu dikerah di bawah Bahagian ini untuk mengambil kerja semula pegawai itu apabila dia selesai menjalankan perkhidmatan aktif menurut pengerahan itu termasuk apa-apa cuti yang terhak baginya bagi perkhidmatan itu dalam pekerjaan dan

di bawah syarat-syarat yang tidak kurang baiknya daripada yang tetap dipakai baginya sekiranya dia tidak dikerah.

(2) Mana-mana majikan yang tidak mengambil kerja semula mana-mana pegawai polis sukarelawan simpanan di bawah subseksyen (1) adalah melakukan suatu kesalahan dan tertakluk sebagaimana diperuntukkan kemudian daripada ini, apabila disabitkan, boleh dikenakan denda tidak melebihi satu ribu ringgit atau hukuman penjara selama tempoh tidak melebihi enam bulan atau kedua-duanya:

Dengan syarat bahawa dalam mana-mana prosiding di bawah subseksyen ini adalah menjadi suatu pembelaan bagi majikan untuk menunjukkan bahawa pegawai polis sukarelawan simpanan yang telah diambil kerja olehnya dahulu telah tidak, sebelum tamat tempoh satu bulan selepas selesai perkhidmatan aktif, memohon kepada majikan untuk bekerja semula atau bahawa, setelah ditawarkan pekerjaan semula olehnya, pegawai itu telah tidak, tanpa sebab yang munasabah menghadirkan diri untuk bekerja pada masa dan di tempat yang telah diberitahu kepadanya oleh majikan itu, atau bahawa oleh sebab perubahan hal keadaan (lain daripada mengguna khidmat seseorang lain bertugas menggantikannya)—

- (a) adalah tidak praktik untuk mengambil kerja semula pegawai itu; atau
- (b) pengambilan kerja semula pegawai itu dalam suatu pekerjaan dan di bawah syarat-syarat yang tidak kurang baiknya daripada yang akan dipakai baginya sekiranya dia tidak dikerah adalah tak praktik, dan bahawa majikan itu telah menawarkan untuk mengambil kerja semula pegawai itu dalam suatu pekerjaan yang paling baik yang semunasabahnya praktik di bawah hal keadaan itu.

BAHAGIAN IX
POLIS BANTUAN

47. Perlantikan pegawai polis bantuan.

(1) Ketua Polis Negara, dengan persetujuan Menteri, boleh melantik atau menaikkan pangkat mana-mana orang untuk berkhidmat dalam Polis Bantuan sebagai pegawai kanan polis bantuan dengan pangkat kehormat Penguasa, Timbalan Penguasa, Penolong Penguasa atau Inspektor, dan boleh menetapkan kawasan di mana pegawai itu akan berkhidmat.

(2) Seorang Pegawai Memerintah atau mana-mana pegawai polis yang diberi kuasa olehnya bagi maksud itu, dengan atau tanpa perjanjian bertulis, boleh melantik atau menaikkan pangkat mana-mana orang untuk berkhidmat dalam Polis Bantuan sebagai pegawai rendah polis bantuan dengan pangkat kehormat sub-inspektor, sarjan mejar, sarjan atau koperal atau sebagai seorang konstabel polis bantuan dan boleh menetapkan kawasan di mana pegawai itu akan berkhidmat.

(3) Bagi maksud Bahagian ini, ungkapan “pegawai polis bantuan” ertinya mana-mana anggota Polis Bantuan.

48. Akuan hendaklah dibuat oleh pegawai polis bantuan.

Tiap-tiap pegawai polis bantuan hendaklah, sebelum mula menjalankan tugas-tugas jawatannya, membuat di hadapan seorang pegawai kanan polis berpangkat tidak rendah daripada Penolong Penguasa akuan yang diperuntukkan dalam Jadual Kedua mengikut apa-apa cara yang diakuinya sebagai paling berkesan pada perasaan hatinya.

49. Perakuan perlantikan.

Suatu perakuan perlantikan dalam bentuk yang ditetapkan oleh Peraturan-Peraturan Polis, ditandatangani oleh seorang pegawai kanan polis berpangkat tidak rendah daripada Penolong Penguasa yang diberi kuasa bagi maksud itu oleh seorang Pegawai Memerintah, hendaklah dikeluarkan kepada tiap-tiap pegawai

polis bantuan dan hendaklah menjadi keterangan mengenai perlantikannya di bawah Akta ini.

[Mas. Akta
A685]

49A. Gaji dan elaun.

Seseorang pegawai polis bantuan hendaklah berkhidmat secara sukarela dan tidak berhak menerima apa-apa saraan bagi perkhidmatan tersebut, kecuali apa-apa elaun yang ditetapkan oleh Menteri dari semasa ke semasa berkenaan dengan tugas-tugas tertentu.

50. Tugas-tugas dan kuasa-kuasa, dll.

Yang di-Pertuan Agong boleh melalui kaedah-kaedah atau peraturan-peraturan menetapkan tugas-tugas, kuasa-kuasa dan keistimewaan-keistimewaan pegawai polis bantuan dan kawasan dalam mana tugas-tugas, kuasa-kuasa dan keistimewaan-keistimewaan itu boleh dijalankan atau dinikmati oleh pegawai itu.

BAHAGIAN X

SIMPANAN POLIS DIRAJA MALAYSIA

51. Simpanan Polis Diraja Malaysia.

(1) Maka hendaklah ditubuhkan Simpanan Polis Diraja Malaysia (kemudian daripada ini disebut sebagai “Polis Simpanan”).

(2) Polis Simpanan hendaklah terdiri daripada pegawai-pegawai polis yang menjadi anggota Polis Simpanan di bawah Bahagian ini.

52. Liabiliti untuk berkhidmat dalam Polis Simpanan.

(1) Tiap-tiap pegawai polis bersara hendaklah menjadi anggota Polis Simpanan jika dia dilantik menjadi seorang pegawai polis pada atau selepas berkuatkuasanya Akta ini dan dia adalah seorang warganegara pada masa persaraannya.

(2) Seksyen ini tidaklah terpakai bagi mana-mana pegawai polis yang telah bersara atas sebab sakit atau hilangnya jasmani atau hilangnya lain.

53. Pegawai polis bersara yang tidak bertanggung berkhidmat boleh memilih untuk berkhidmat.

(1) Walau apa pun seksyen 52 seorang pegawai polis yang tidak bertanggung untuk berkhidmat dalam Polis Simpanan atas alasan bahawa perantikannya dalam Pasukan adalah sebelum tarikh yang disebut dalam seksyen itu boleh didaftarkan sebagai seorang anggota Polis Simpanan:

Dengan syarat bahawa tiada seorang pun pegawai polis boleh didaftarkan sebagai anggota Polis Simpanan jika dia telah bersara selama tempoh sepuluh tahun atau telah mencapai umur lima tahun lebih daripada umur persaraan yang diwajibkan, mengikut mana yang lebih awal.

(2) Seksyen-seksyen yang berikut dalam Bahagian ini hendaklah terpakai bagi seorang pegawai polis didaftarkan sebagai seorang anggota Polis Simpanan di bawah seksyen ini sebagaimana ianya terpakai bagi seorang pegawai polis yang bertanggung berkhidmat dalam Polis Simpanan.

54. Tempoh perkhidmatan dalam Polis Simpanan.

Tiap-tiap anggota Polis Simpanan (kemudian daripada ini disebut sebagai “pegawai polis simpanan”) hendaklah, tertakluk kepada seksyen 62, 63 dan 64, berkhidmat dalam Polis Simpanan selama tempoh sepuluh tahun dari tarikh persaraannya atau sehingga dia mencapai umur lima tahun lebih daripada umur persaraan yang diwajibkan, mengikut mana yang lebih awal.

55. Pengerahan Polis Simpanan.

(1) Polis Simpanan atau mana-mana bahagian daripadanya boleh dikerah dengan sesuatu perintah oleh Yang di-Pertuan Agong pada bila-bila masa apabila keselamatan Malaysia terancam atau apabila suatu Pengisytiharan Darurat dikeluarkan.

(2) Subseksyen (1) tidak akan melibatkan mana-mana pegawai polis simpanan yang adalah seorang Anggota Parlimen atau Dewan Perundangan sesuatu Negeri atau seseorang yang menyandang perlantikan bergaji dalam Kerajaan Malaysia atau kerajaan mana-mana Negeri, selama mana dia adalah seorang Anggota atau menyandang perlantikan itu.

56. Polis simpanan dikehendaki melapor.

Tiap-tiap pegawai polis simpanan yang dikerah di bawah seksyen 55 hendaklah melaporkan diri di tempat dan pada masa yang diperintahkan oleh Ketua Polis Negara atau seorang pegawai yang diberi kuasa dengan sewajarnya oleh Ketua Polis Negara.

57. Kuasa-kuasa pegawai polis apabila dikerah.

Seseorang pegawai polis simpanan apabila dikerah hendaklah mempunyai kuasa-kuasa dan tugas-tugas yang sama dan perlindungan dan imuniti yang sama sebagai seorang pegawai polis yang bersamaan pangkat dengannya dan hendaklah tertakluk dalam semua keadaan kepada Akta ini, dan apa-apa kaedah-kaedah, peraturan-peraturan dan perintah-perintah tetap yang dibuat di bawahnya.

58. Pangkat dalam Polis Simpanan.

Seseorang pegawai polis simpanan tidak boleh dikehendaki berkhidmat dalam Polis Simpanan dengan pangkat lebih rendah daripada yang disandangnya pada masa bersara.

59. Gaji dan elaun.

Gaji dan elaun seseorang pegawai polis simpanan yang dikerah untuk berkhidmat dalam Pasukan ialah gaji dan elaun yang dari semasa ke semasa ditetapkan untuk seorang pegawai yang telah diberi pencen di bawah mana-mana undang-undang berhubungan dengan pencen dan yang diambil kerja semula dalam perkhidmatan awam.

60. Cuti.

Seseorang pegawai polis simpanan, dalam tempoh dia dikerah, hendaklah mendapat gaji penuh semasa cuti dengan kadar yang sama seperti seorang pegawai polis yang bersamaan pangkat dengannya.

61. Penahanan pencen.

Seseorang pegawai polis simpanan hendaklah dalam tempoh dia dikerah terus mendapat pencen penuh yang dia berhak, tetapi tempoh dalam mana dia dikerah tidak boleh dianggap sebagai perkhidmatan berpencen.

62. Dilepaskan daripada Polis Simpanan.

Seseorang pegawai polis simpanan boleh dilepaskan daripada Polis Simpanan—

- (a) jika dia bermastautin tetap di luar Malaysia; atau
- (b) jika dia diperakui oleh seorang Pegawai Perubatan Kerajaan sebagai tidak layak selama-lamanya untuk bertugas.

63. Diberhentikan daripada Polis Simpanan dan rayuan.

(1) Seorang pegawai polis simpanan yang dengan kelakuannya telah menunjukkan dirinya tak sesuai untuk berkhidmat selanjutnya boleh dibuang kerja, dan mana-mana pegawai polis simpanan yang perkhidmatannya tidak dikehendaki lagi atas apa-apa sebab boleh dilepaskan, daripada Polis Simpanan oleh Ketua Polis Negara:

Dengan syarat bahawa seorang pegawai polis simpanan yang telah dikerah untuk berkhidmat di bawah seksyen 55 tidak boleh dibuang kerja atau dilepaskan kecuali oleh Suruhanjaya Pasukan Polis.

(2) Mana-mana pegawai polis simpanan yang terkilang dengan pembuangan atau perlepasannya (kecuali pembuangan atau perlepasan itu oleh Suruhanjaya Pasukan Polis) boleh merayu

kepada Menteri terhadap pembuangan atau perlepasan itu; dan keputusan Menteri mengenainya adalah muktamad.

64. Penamatan perkhidmatan dalam masa pengerahan.

Walau apa pun seksyen 15 dan 54 tetapi tertakluk kepada seksyen 62 tiap-tiap pegawai polis simpanan hendaklah dalam sesuatu tempoh darurat atau perang terus berkhidmat dalam Pasukan Polis—

- (a) selagi darurat atau perang itu berterusan;
- (b) sehingga dia telah genap lima belas tahun bersara daripada Pasukan; atau
- (c) sehingga dia telah mencapai umur enam puluh lima tahun,

mengikut mana satu yang disebutkan itu berlaku awal sekali.

65. Pakaian seragam dan peralatan.

(1) Seseorang pegawai polis simpanan hendaklah menyimpan dalam miliknya dan menyenggara dalam keadaan baik apa-apa pakaian seragam dan peralatan yang ditetapkan; dan pakaian seragam dan peralatan itu tidak boleh dipakai kecuali semasa Polis Simpanan tersebut dikerah atau pada masa-masa khas yang baginya kebenaran tertentu diberi oleh Ketua Polis Negara.

(2) Subseksyen (1) dan (2) seksyen 17 hendaklah terpakai bagi seorang pegawai polis simpanan apabila sahaja dia terhenti menjadi anggota Polis Simpanan.

66. Menempatkan semula dalam pekerjaan sivilian pegawai-pegawai polis dalam Polis Simpanan.

(1) Adalah menjadi kewajipan majikan yang telah mengambil kerja mana-mana pegawai polis simpanan selama tempoh sekurang-kurangnya tiga bulan sebelum sahaja tarikh pegawai itu dikerah di bawah Bahagian ini mengambil kerja semula pegawai itu apabila dia selesai menjalankan perkhidmatan aktif menurut pengerahan itu termasuk apa-apa cuti yang terhak baginya bagi

perkhidmatan itu dalam pekerjaan dan di bawah syarat-syarat yang tidak kurang baiknya daripada yang tetap dipakai baginya sekiranya dia tidak dikerah.

(2) Mana-mana majikan yang tidak mengambil kerja semula mana-mana pegawai polis simpanan di bawah subseksyen (1) adalah melakukan suatu kesalahan dan, tertakluk sebagaimana diperuntukkan kemudian daripada ini, apabila disabitkan, boleh dikenakan denda tidak melebihi satu ribu ringgit atau hukuman penjara selama tempoh tidak melebihi enam bulan atau kedua-duanya:

Dengan syarat bahawa dalam apa-apa prosiding di bawah subseksyen ini adalah menjadi suatu pembelaan bagi majikan menunjukkan bahawa pegawai polis simpanan yang telah diambil kerja olehnya dahulu itu telah tidak, sebelum tamat satu bulan selepas selesai perkhidmatan aktif, memohon kepada majikan untuk bekerja semula atau bahawa, setelah ditawarkan pekerjaan semula olehnya, pegawai itu telah tidak, tanpa sebab yang munasabah, menghadirkan diri untuk bekerja pada masa dan di tempat yang telah diberitahu kepadanya oleh majikan itu, atau bahawa oleh sebab perubahan hal keadaan (lain daripada mengguna khidmat seseorang lain bagi menggantikannya)—

- (a) adalah tidak praktik untuk mengambil kerja semula pegawai itu; atau
- (b) pengambilan kerja semula pegawai itu dalam suatu pekerjaan dan di bawah syarat-syarat yang tidak kurang baiknya daripadanya yang akan dipakai baginya sekiranya dia tidak dikerah adalah tak praktik, dan bahawa majikan itu telah menawarkan untuk mengambil kerja semula pegawai itu dalam suatu pekerjaan yang paling baik dan di bawah syarat-syarat yang paling baik yang semunasabahnya praktik di bawah hal keadaan itu.

67. Penalti.

Seseorang pegawai polis yang dikerah di bawah seksyen 55 yang tanpa sebab yang munasabah, yang mana beban pembuktian hendaklah terletak ke atasnya, tidak melapor di tempat dan pada

masa yang ditetapkan di dalam suatu perintah yang dibuat di bawah seksyen 56, tidak berpakaian seragam dengan sempurna dan melangkapi diri mengikut skala yang ditetapkan, adalah melakukan suatu kesalahan dan apabila disabitkan boleh dikenakan hukuman penjara selama tempoh tidak melebihi satu tahun atau denda tidak melebihi satu ribu ringgit atau keduanya.

BAHAGIAN XI

KOR KADET POLIS DIRAJA MALAYSIA

68. Penubuhan Kor Kadet.

(1) Maka hendaklah ditubuhkan dalam dan bagi mana-mana kawasan dalam Malaysia yang diisytiharkan dengan perintah oleh Menteri suatu badan bernama Kor Kadet Polis Diraja Malaysia (kemudian daripada ini disebut “Kor Kadet”) yang hendaklah terdiri daripada sebilangan pegawai-pegawai kanan Kor Kadet, pegawai-pegawai rendah Kor Kadet dan kadet-kadet yang diizinkan dari semasa ke semasa oleh Yang di-Pertuan Agong.

(2) Kor Kadet hendaklah ditubuhkan mengikut bahagian-bahagian, subbahagian-subbahagian dan unit-unit sebagaimana ditetapkan dari semasa ke semasa.

(3) Kor Kadet hendaklah digabungkan dengan Pasukan tetapi anggota-anggota Kor Kadet bukanlah pegawai-pegawai polis mengikut pengertian Akta ini.

69. Anggota-anggota Kor Kadet.

(1) Seseorang (bukan anggota Angkatan Tentera Malaysia atau mana-mana pasukan ditubuhkan di bawah mana-mana undang-undang bertulis), yang berumur tidak rendah daripada dua puluh satu tahun atau lebih daripada lima puluh tahun, yang memiliki kelayakan-kelayakan yang ditetapkan, boleh menawarkan dirinya dan boleh diterima untuk dilantik sebagai pegawai kanan Kor Kadet.

(2) Seseorang yang menjalani pelajaran sepenuh masa di mana-mana sekolah yang ditetapkan oleh Menteri, boleh mendaftar dan diterima dalam Kor Kadet sebagai seorang Kadet.

70. Perlantikan, kenaikan pangkat dan pembuangan kerja Pegawai Kadet dan Kadet.

(1) Pegawai-pegawai kadet bolehlah dilantik ke pangkat pegawai kanan Kor Kadet atau pegawai rendah Kor Kadet, mengikut mana yang berkenaan selaras dengan kelayakan-kelayakan mereka.

(2) Pegawai-pegawai kanan Kor Kadet berpangkat Penolong Penguasa atau ke atas boleh dengan persetujuan Menteri dilantik, dinaikkan pangkat atau dibuang kerja oleh Ketua Polis Negara.

(3) Pegawai-pegawai kanan Kor Kadet berpangkat Ketua Inspektor atau ke bawah boleh dilantik, dinaikkan pangkat atau dibuang kerja oleh Ketua Polis Negara.

(4) Pegawai-pegawai rendah Kor Kadet dan kadet-kadet boleh dilantik, dinaikkan pangkat atau dibuang kerja oleh Pegawai Memerintah:

Dengan syarat bahawa orang yang diberi kuasa melantik mana-mana pegawai kadet atau kadet di bawah seksyen ini hendaklah mempunyai kuasa untuk menghendaki pegawai kadet atau kadet itu meletakkan jawatan jika orang itu berpendapat bahawa pegawai kadet atau kadet itu tidak berupaya atas apa-apa sebab, menjalankan dengan cekap tugas-tugas yang dikehendaki atau mungkin dikehendaki supaya dilaksanakan olehnya sebagai pegawai kadet atau kadet.

71. Perletakan jawatan.

Mana-mana anggota Kor Kadet boleh meletakkan jawatan daripada Kor Kadet dengan memberi satu bulan notis secara bertulis kepada Pegawai Memerintah.

72. Gaji dan elaun.

Seseorang anggota Kor Kadet hendaklah berkhidmat secara sukarela dan tidak berhak menerima apa-apa saraan bagi perkhidmatannya, kecuali elaun-elaun yang ditetapkan.

73. Pembubaran.

Apabila didapati bermanfaat oleh Menteri, dia boleh, dengan kelulusan Yang di-Pertuan Agong, membubar atau menghentikan Kor Kadet atau mana-mana bahagian daripadanya.

**BAHAGIAN XII
DISIPLIN**

74. Pegawai-pegawai polis tertakluk kepada peraturan-peraturan disiplin.

Semua anggota Pasukan hendaklah tertakluk kepada peraturan-peraturan berhubungan dengan disiplin yang boleh dibuat oleh Yang di-Pertuan Agong dari semasa ke semasa di bawah Perkara 132 (2) Perlembagaan Persekutuan atau di bawah seksyen 96 Akta ini.

75. Denda didapati daripada potongan gaji.

Semua denda yang dikenakan oleh atau di bawah kuasa Pihak Berkuasa Disiplin berkenaan dengan kesalahan-kesalahan terhadap disiplin boleh didapati dengan memotong gaji, ditolak elaun dan bayaran ketukangan yang kena dibayar, atau akan kena dibayar kepada pesalah:

Dengan syarat bahawa potongan gaji itu tidak akan dalam mana-mana keadaan melebihi satu pertujuh daripada gaji bulanan, ditolak elaun dan bayaran ketukangan, pesalah itu, dan, jika lebih daripada satu perintah potongan gaji berkuatkuasa dengan serentak terhadap pesalah, sekian banyak sahaja gajinya akan ditahan supaya sekurang-kurangnya pesalah itu menerima tiga perempat daripada gaji tersebut, tidak termasuk elaun dan bayaran ketukangan.

76. Gaji penuh tidak terakru semasa tidak hadir tanpa kebenaran atau semasa dalam penjara.

Tiada apa-apa gaji dan elaun, termasuk bayaran ketukangan tetapi tidak termasuk elaun sewa rumah akan terakru kepada mana-mana pegawai polis bagi mana-mana tempoh yang dia tidak hadir bertugas tanpa kebenaran atau sebab yang memuaskan, atau sedang menjalani apa-apa hukuman penjara:

Dengan syarat bahawa Pihak Berkuasa Disiplin boleh, mengikut budi bicaranya, membenarkan dibayar apa-apa kadar gaji, elaun dan bayaran ketukangan yang tidak lebih daripada separuh, sebagaimana difikirkannya patut.

77. Senjata, kelengkapan, dll., yang hilang atau rosak hendaklah diganti dengan potongan gaji.

Walau apa pun terkandung dalam mana-mana undang-undang lain, jika mana-mana pegawai polis menggadai, menjual, menghilangkan kerana abai, membuang atau dengan sengaja atau dengan cuai merosakkan apa-apa senjata api, amunisi, perlengkapan, pakaian seragam atau artikel lain berupa harta yang diamanahkan kepada atau secara sah ada dalam milik Pasukan dan dibekalkan kepadanya, atau apa-apa harta yang diserahkan kepada jagaannya dalam perjalanan tugasnya, atau apa-apa harta yang disita atau diambil olehnya ke dalam jagaannya dalam perjalanan tugasnya, dia boleh, sebagai tambahan kepada atau sebagai ganti apa-apa penalti lain, diperintahkan mengganti, sama ada kesemuanya atau sebahagiannya, nilai harta itu atau amaun kerugian atau kerosakan itu, mengikut mana yang berkenaan, dan nilai itu atau amaun itu boleh didapati melalui penahanan gajinya, termasuk elaun, selain daripada elaun sewa rumah dan bayaran ketukangan.

78. Tahan kerja.

(1) Jika difikirkan perlu untuk kepentingan awam supaya seseorang pegawai polis berhenti menjalankan kuasa-kuasa dan fungsi-fungsi jawatannya dengan serta-merta, Pihak Berkuasa Disiplin boleh menahan kerja pegawai polis itu, sementara

menanti apa-apa penyiataan mengenai kelakuan pegawai polis itu di bawah Akta ini atau mana-mana Peraturan-Peraturan Polis yang dibuat di bawahnya atau mana-mana peraturan atau perintah yang terpakai kepada pegawai-pegawai lain yang mempunyai taraf yang sama di dalam perkhidmatan awam.

(2) Kuasa-kuasa, keistimewaan-keistimewaan dan faedah-faedah yang terletak pada pegawai polis yang telah ditahan kerja di bawah subseksyen (1) hendaklah tergantung semasa ditahan kerja:

Dengan syarat bahawa pegawai polis itu hendaklah terus tertakluk kepada pihak berkuasa dan disiplin yang sama seolah-olah dia tidak ditahan kerja dan dia tidaklah semata-mata oleh sebab ditahan kerja terhenti menjadi pegawai polis.

(3) Dalam apa-apa tempoh pegawai polis ditahan kerja yang menunggu perbincangan atau prosiding disiplin di mana dia disabitkan atau didapati salah, pegawai polis itu hendaklah menerima separuh daripada gaji dan elaun-elaunnya, kecuali elaun sewa rumah hendaklah dibayar dengan penuh. Tiada apa-apa bayaran ketukangan boleh terakru dalam apa-apa tempoh tahanan kerja:

Dengan syarat bahawa Pihak Berkuasa Disiplin boleh, mengikut budi bicaranya, membenarkan dibayar apa-apa kadar gaji dan elaun yang lebih tinggi sebagaimana difikirkannya patut.

79. Jawatankuasa Siasatan bagi Jabatan berkenaan dengan kematian atau kecederaan mana-mana pegawai polis atau berkenaan dengan kehilangan atau kerosakan harta.

(1) Pegawai Memerintah boleh mengadakan suatu Jawatankuasa Siasatan untuk menyasat kematian atau kecederaan mana-mana pegawai polis atau kehilangan atau kerosakan apa-apa harta yang diamanahkan kepada atau yang secara sah ada dalam milik Pasukan. Jawatankuasa Siasatan itu hendaklah terdiri daripada seorang Yang Dipertua, yang mana hendaklah seorang pegawai kanan polis berpangkat tidak rendah

daripada Penolong Penguasa, dan seorang anggota atau lebih, sebagaimana diarahkan oleh Pegawai Memerintah itu.

(2) Jawatankuasa Siasatan yang diadakan di bawah subseksyen (1) untuk menyiasat kematian atau kecederaan seorang pegawai polis hendaklah diberi kuasa mengemukakan dapatan-dapatan dan syor-syor seperti berikut:

- (a) sama ada si mati atau orang yang cedera itu sedang bertugas pada masa kematian atau kecederaan itu;
- (b) sama ada kematian atau kecederaan itu boleh dikaitkan secara langsung kepada jenis tugas yang mana si mati atau orang yang cedera itu telah diguna khidmat;
- (c) sama ada kematian atau kecederaan itu disebabkan oleh keingkaran si mati atau orang yang cedera itu;
- (d) sama ada pencen, ganjaran atau elaun patut dibayar menurut Kaedah-Kaedah yang dibuat di bawah Akta ini atau di bawah mana-mana undang-undang bertulis yang lain;
- (e) sama ada apa-apa tindakan perlu untuk mencegah berlakunya di masa depan kematian atau kecederaan yang serupa ke atas pegawai-pegawai polis yang lain.

(3) Jawatankuasa Siasatan yang diadakan di bawah subseksyen (1) untuk menyiasat apa-apa kehilangan atau kerosakan apa-apa harta yang diamanahkan kepada atau yang secara sah ada dalam milik Pasukan hendaklah mengemukakan dapatan-dapatan dan syor-syor kepada Pegawai Memerintah seperti berikut:

- (a) anggaran kos kerugian atau kerosakan;
- (b) tanggungjawab tiap-tiap seorang terhadap kehilangan atau kerosakan itu;
- (c) tindakan yang perlu untuk mencegah berlakunya di masa depan kehilangan atau kerosakan yang serupa;
- (d) cara bagaimana kos kerugian atau kerosakan boleh didapatkan atau dibayar sebagai ganti kepada pemunya harta itu yang sah.

(4) Dalam seksyen ini ungkapan “pegawai polis” meliputi semua orang yang dilantik atau diguna khidmat untuk menjalankan tugas-tugas polis di bawah Akta ini; dan ungkapan “Pasukan” meliputi semua badan yang ditubuhkan atau didirikan untuk menjalankan tugas-tugas polis di bawah Akta ini.

80. Kuasa pegawai kanan polis yang mengadakan penyiasatan untuk menyaman saksi-saksi.

(1) Pegawai kanan polis yang diberi kuasa untuk menjalankan penyiasatan ke atas suatu kesalahan terhadap disiplin dan Yang Dipertua mana-mana Jawatankuasa Siasatan yang diadakan di bawah seksyen 79 boleh memohon kepada Majistret supaya mengeluarkan suatu saman untuk mendapatkan seorang yang difikirkan tahu akan hal keadaan perkara itu supaya hadir sebagai saksi di hadapan pegawai polis itu. Atas permohonan itu, Majistret boleh mengeluarkan saman dengan sewajarnya dan saksi itu adalah diwajibkan menjawab dengan sebenarnya semua soalan berhubungan dengan perkara itu yang dikemukakan kepadanya oleh pegawai polis itu, dan hendaklah mengemukakan semua dokumen yang relevan dengan perkara itu.

(2) Seseorang yang disaman sebagai saksi di bawah subseksyen (1) yang tidak hadir pada masa dan tempat yang dinyatakan dalam saman itu atau pada masa penangguhan, atau enggan menjawab apa-apa soalan yang dikemukakan padanya secara sah atau enggan mengemukakan apa-apa dokumen yang dia berkuasa mengemukakannya, adalah melakukan suatu kesalahan di bawah Akta ini dan boleh dikenakan denda satu ratus ringgit atau hukuman penjara selama tempoh tidak melebihi satu bulan atau kedua-duanya:

Dengan syarat bahawa tiada apa jua yang terkandung dalam seksyen ini boleh menjadikan mana-mana orang terpaksa menjawab apa-apa soalan atau mengemukakan apa-apa dokumen berkenaan dengan apa-apa perkara yang akan dilindungi daripada dizahirkan atas alasan keistimewaan jika prosiding itu diadakan di mana-mana mahkamah.

BAHAGIAN XIII
KUMPULAN WANG POLIS

81. Kumpulan Wang Polis.

(1) Maka hendaklah ditubuhkan suatu kumpulan wang bernama Kumpulan Wang Polis yang akan dikendalikan sebagai Akaun Amanah dalam Kumpulan Wang Disatukan Persekutuan.

(2) Kumpulan Wang Polis (dalam Bahagian ini disebut sebagai “Kumpulan Wang”) hendaklah terdiri daripada—

- (a) denda-denda yang dikenakan ke atas pegawai-pegawai polis dalam mana-mana prosiding disiplin;
- (b) satu perdua daripada jumlah wang yang dibayar bagi perkhidmatan tambahan atau khas yang diberi oleh pegawai-pegawai polis;
- (c) semua jumlah wang dan harta lain yang diberi kepada pegawai-pegawai polis dan dilucuthakkan atas perintah mahkamah;
- (d) apa-apa jumlah wang yang dibayar kepada Kumpulan Wang di bawah seksyen 22;
- (e) derma-derma atau hadiah-hadiah yang diberikan kepada Kumpulan Wang atau kepada anggota-anggota perseorangan Pasukan masing-masing dan diterima oleh Ketua Polis Negara; dan
- (f) pendapatan yang didapati daripada pelupusan harta yang telah dibeli atau didapati daripada pelaburan daripada wang Kumpulan Wang.

82. Kumpulan Wang Polis dan maksud-maksud Kumpulan Wang.

(1) Kumpulan Wang hendaklah dikawal oleh Ketua Polis Negara tertakluk kepada apa-apa kaedah-kaedah atau peraturan-peraturan yang dibuat di bawah Akta ini.

(2) Kumpulan Wang itu hendaklah digunakan bagi maksud-

- (a) memberi hadiah kepada pegawai-pegawai polis bagi perkhidmatan tambahan atau khas yang diberi oleh mereka;
- (b) mengadakan bagi pegawai-pegawai polis yang sedang berkhidmat atau telah bersara atau telah diberhentikan dengan pencen, ganjaran atau elaun, apa-apa keselesaan, kesenangan atau kemudahan atau faedah lain yang tidak dipertanggungjawabkan kepada hasil awam; dan
- (c) memberi pinjaman atas terma-terma yang ditetapkan oleh kaedah-kaedah kepada pegawai-pegawai polis yang sedang berkhidmat atau telah bersara atau telah diberhentikan dengan pencen atau ganjaran atau kepada orang-orang tanggungan pegawai-pegawai polis yang telah mati.

83. Pemindahan Kumpulan Wang.

Semua wang dan aset atau harta lain jika ada yang terkandung dalam atau dipegang di bawah atau bagi pihak mana-mana kumpulan wang polis yang diadakan atau ditubuhkan di bawah mana-mana undang-undang yang telah dimansuhkan oleh Akta ini termasuk apa-apa bunga yang terakru di atasnya jika ada, sebelum sahaja mula berkuatkuasanya Akta ini, apabila sahaja berkuatkuasanya Akta ini, hendaklah disifatkan sebagai dipindahkan kepada Kumpulan Wang dan hendaklah menjadi sebahagian daripada Kumpulan Wang yang ditubuhkan di bawah Bahagian ini.

84. Tafsiran.

Dalam Bahagian ini ungkapan “pegawai polis” meliputi pegawai polis tambahan, anggota Polis Simpanan, Sukarelawan Simpanan Polis dan Polis Bantuan dan mana-mana anggota pasukan polis dari mana-mana wilayah yang ada dalam Malaysia di bawah Akta ini.

BAHAGIAN XIV

AM

85. Membawa senjata.

Seseorang pegawai polis boleh dalam melaksanakan tugas-tugasnya membawa senjata.

86. Pembolosan.

(1) Mana-mana pegawai polis yang tanpa sebab yang munasabah, yang mana beban pembuktian hendaklah terletak ke atasnya, tidak menghadirkan dirinya untuk menjalankan tugas selama tempoh dua puluh satu hari berterusan atau dalam hal keadaan yang menunjukkan bahawa dia bertujuan tidak akan kembali menjalankan tugas-tugasnya hendaklah disifatkan sebagai telah membolos, dan adalah melakukan suatu kesalahan dan apabila disabitkan boleh dikenakan hukuman penjara selama tempoh tidak melebihi dua belas bulan.

(2) Jika seorang telah disabitkan di bawah seksyen ini, Pihak Berkuasa Disiplin bolehlah mengarahkan supaya semua tunggakan gaji yang kena dibayar kepada orang itu dilucuthakkan.

(3) Dalam subseksyen (1) ungkapan “pegawai polis” meliputi pegawai polis tambahan, anggota Polis Simpanan dan Sukarelawan Simpanan Polis apabila dikerah di bawah Akta ini dan mana-mana anggota pasukan polis dari wilayah lain yang ada dalam Malaysia di bawah Akta ini.

87. Dahagi.

Mana-mana pegawai polis yang menyebabkan, mengapiakan, atau masuk serta dalam apa-apa dahagi atau penderhakaan dalam Pasukan atau berkomplot dengan mana-mana orang lain untuk menyebabkan dahagi atau penderhakaan itu, atau tidak berusaha dengan sedaya upayanya untuk menumpaskan apa-apa dahagi atau penderhakaan itu atau, setelah mengetahui akan apa-apa dahagi atau penderhakaan atau cadangan akan apa-apa dahagi

atau penderhakaan, tidak, tanpa berlengah-lengah, memberi maklumat mengenainya kepada pegawai polis atasannya, adalah melakukan suatu kesalahan dan apabila disabitkan boleh dikenakan hukuman penjara selama tempoh tidak melebihi lima tahun.

88. Penalti kerana menyebabkan penderhakaan.

(1) Seseorang yang menyebabkan atau cuba menyebabkan atau melakukan apa-apa perbuatan yang dikira akan menyebabkan penderhakaan di kalangan anggota-anggota Pasukan atau mendorong atau cuba mendorong mana-mana anggota itu supaya tidak memberi perkhidmatannya atau supaya melakukan langgaran disiplin adalah melakukan suatu kesalahan dan apabila disabitkan boleh dikenakan hukuman penjara selama tempoh tidak melebihi dua tahun atau denda tidak melebihi satu ribu ringgit atau kedua-duanya. Mana-mana pegawai kanan polis boleh menangkap tanpa waran mana-mana orang yang semunasabahnya disyaki telah melakukan suatu kesalahan di bawah seksyen ini.

(2) Dalam seksyen 87 dan seksyen ini ungkapan “pegawai polis” meliputi semua orang yang dilantik atau diguna khidmat untuk menjalankan tugas-tugas polis di bawah Akta ini dan mana-mana anggota polis dari suatu wilayah lain yang ada dalam Malaysia di bawah Akta ini; dan ungkapan “Pasukan” meliputi semua badan yang ditubuhkan atau didirikan untuk menjalankan tugas-tugas polis di bawah Akta ini dan pasukan polis dari suatu wilayah lain yang mana-mana anggotanya mungkin ada dalam Malaysia di bawah Akta ini.

89. Memiliki, membuat, menjual atau membekalkan secara haram peralatan-peralatan yang dibekalkan kepada pegawai polis dan penggunaan pakaian seragam polis tanpa kebenaran.

Seseorang, yang bukannya seorang pegawai polis, yang—

(a) didapati ada dalam miliknya apa-apa peralatan yang telah dibekalkan kepada mana-mana pegawai polis

untuk melaksanakan tugasnya, atau apa-apa pingat atau bintang penghormatan yang diberi kepada mana-mana pegawai polis kerana keberanian, perkhidmatan atau kelakuan baik, dan yang tidak dapat menerangkan dengan memuaskan bagaimana ianya ada dalam miliknya, atau yang, tanpa kebenaran yang sah, membeli atau menerima apa-apa peralatan itu, pingat atau bintang penghormatan atau yang membantu atau bersubahat dengan mana-mana pegawai polis dalam menjual atau melupuskan apa-apa peralatan, pingat atau bintang penghormatan itu;

- (b) tanpa kebenaran yang sah membuat, menjual atau membekal, atau menawar untuk menjual atau membekal, suatu *facsimile* munasabah apa-apa lencana atau tanda yang digunakan untuk menunjukkan bahawa seseorang itu adalah anggota Pasukan atau mana-mana badan yang ditubuhkan atau didirikan untuk menjalankan tugas-tugas polis di bawah Akta ini, atau suatu *facsimile* munasabah apa-apa lencana atau tanda yang digunakan untuk menunjuk pangkat seseorang anggota Pasukan atau seseorang anggota mana-mana badan yang ditubuhkan atau didirikan untuk menjalankan tugas-tugas polis di bawah Akta ini, atau suatu *facsimile* munasabah apa-apa pingat atau bintang penghormatan yang diberi kepada mana-mana pegawai polis kerana keberanian, perkhidmatan atau kelakuan baik atau yang membantu atau bersubahat dengan mana-mana orang dalam membuat, menjual atau membekal *facsimile* itu; atau
- (c) tanpa kebenaran seorang Pegawai Memerintah, secara haram memakai, mengguna atau mempamerkan kecuali semasa mengadakan permainan pentas atau lain-lain pertunjukan panggung, apa-apa pakaian seragam Pasukan atau apa-apa lencana atau tanda untuk menunjukkan yang dia seorang anggota Pasukan atau mana-mana badan lain yang ditubuhkan atau didirikan

untuk menjalankan tugas-tugas polis di bawah Akta ini, atau apa-apa pakaian yang berupa atau mempunyai tanda-tanda tertentu pakaian seragam itu,

adalah melakukan suatu kesalahan di bawah Akta ini.

90. Kelakuan tak senonoh di balai polis.

Seorang yang berkelakuan rusuh, lucuh, tak senonoh atau aib di balai polis adalah melakukan suatu kesalahan di bawah Akta ini.

91. Pegawai polis boleh menangkap tanpa waran bagi kesalahan-kesalahan di bawah seksyen 31 (2), 86, 87, 89 dan 90.

Seseorang pegawai polis boleh menangkap tanpa waran mana-mana orang yang melanggar atau yang disyaki dengan munasabah telah melakukan mana-mana kesalahan di bawah seksyen 31 (2), 86, 87, 89 dan 90.

92. Pegawai polis tidak boleh menjadi anggota Kesatuan Sekerja.

(1) Walau apa pun yang terkandung dalam mana-mana undang-undang lain, seseorang pegawai polis yang, tertakluk kepada Akta ini, menjadi atau selepas tamat satu bulan dari mula berkuatkuasanya Akta ini masih menjadi, seorang anggota mana-mana kesatuan sekerja, atau mana-mana persatuan yang mempunyai tujuan-tujuan politik, atau mana-mana parti politik adalah melakukan suatu kesalahan di bawah Akta ini.

(2) Bagi maksud seksyen ini apa-apa soalan sama ada mana-mana badan adalah kesatuan sekerja atau persatuan yang dimaksudkan oleh seksyen ini hendaklah diputuskan oleh Menteri.

(3) Dalam seksyen ini ungkapan “pegawai polis” meliputi pegawai polis tambahan dan mana-mana anggota pasukan polis dari suatu wilayah lain yang ada di dalam Malaysia di bawah Akta ini.

93. Persatuan-persatuan polis.

Bagi maksud untuk membolehkan pegawai-pegawai polis menimbangkan dan membawa kepada perhatian Kerajaan semua perkara yang melibatkan kebajikan dan kecekapan mereka, termasuk gaji, pencen dan syarat-syarat perkhidmatan, lain daripada soalan-soalan yang melibatkan kenaikan pangkat individu dan disiplin, suatu persatuan atau lebih boleh ditubuhkan dan persatuan itu hendaklah dikendalikan serta ditadbir menurut kaedah-kaedah. Mana-mana persatuan sedemikian dan cawangannya hendaklah pada keseluruhannya bebas daripada dan tidak bersekutu dengan mana-mana badan atau orang di luar Pasukan, dan hendaklah dikecualikan daripada mana-mana undang-undang yang berhubungan dengan pendaftaran pertubuhan.

94. Penalti am.

Seseorang yang melakukan suatu kesalahan di bawah Akta ini yang baginya tiada apa-apa penalti lain yang diperuntukkan dengan nyata, boleh dikenakan denda tidak melebihi lima ratus ringgit atau hukuman penjara selama tempoh tidak melebihi enam bulan atau kedua-duanya.

95. Kaedah-kaedah.

(1) Yang di-Pertuan Agong boleh membuat kaedah-kaedah yang tidak berlawanan dengan Akta ini, bagi menjalankan maksud-maksud Akta ini.

(2) Khususnya dan tanpa menyentuh keluasan yang tersebut di atas, Yang di-Pertuan Agong boleh membuat kaedah-kaedah berhubungan dengan semua atau mana-mana perkara berikut—

- (a) pengkelasan dan kekananan berbagai gred, pangkat dan perlantikan dalam Pasukan dan dalam semua badan lain yang ditubuhkan atau didirikan untuk menjalankan tugas-tugas polis di bawah Akta ini;
- (b) pemberian dalam hal-hal tertentu darjat kehormat kepada mana-mana orang dan masa mana-mana orang itu boleh memakai pakaian seragam darjat kehormat itu;

- (c) bayaran pencen dan ganjaran, gaji dan elaun dan pampasan kepada anggota-anggota Pasukan dan anggota-anggota semua badan lain yang ditubuhkan atau didirikan untuk menjalankan tugas-tugas polis di bawah Akta ini;
- (d) pentadbiran Kumpulan Wang Polis;
- (e) semua perkara yang, di bawah Akta ini, boleh diadakan atau ditetapkan melalui kaedah-kaedah;
- (f) secara amnya bagi faedah dan pentadbiran Pasukan dan semua badan lain yang ditubuhkan atau didirikan untuk menjalankan tugas-tugas polis di bawah Akta ini.

96. Peraturan-Peraturan Polis.

(1) Yang di-Pertuan Agong boleh membuat peraturan-peraturan yang bernama “Peraturan-Peraturan Polis” yang tidak berlawanan dengan Akta ini.

(2) Khususnya dan tanpa menyentuh keluasan yang tersebut di atas, Yang di-Pertuan Agong boleh membuat Peraturan-Peraturan Polis, berhubungan dengan semua atau mana-mana perkara berikut—

- (a) kenaikan pangkat dan penurunan pangkat;
- (b) disiplin, termasuk pentakrifan kesalahan-kesalahan disiplin, prosedur disiplin dan mengawalselia dan melaksanakan hukuman;
- (c) kenaikan pangkat dan peperiksaan kemahiran;
- (d) perihal dan pengeluaran senjata, amunisi, perlengkapan, pakaian seragam dan keperluan-keperluan untuk dibekalkan kepada anggota-anggota Pasukan dan kepada anggota-anggota badan-badan lain yang ditubuhkan atau didirikan untuk menjalankan tugas-tugas polis di bawah Akta ini;
- (e) kebenaran untuk tak hadir;
- (f) bayaran yang dikenakan kepada anggota-anggota awam atau pihak berkuasa berkanun bagi perkhidmatan

- tambahan dan khas oleh polis dan untuk salinan laporan-laporan, pelan-pelan dan gambarfoto-gambarfoto yang dibuat oleh pegawai-pegawai polis;
- (g) semua perkara yang, di bawah Akta ini, boleh diperuntukkan atau ditetapkan oleh Peraturan-Peraturan Polis.

97. Perintah Tetap.

Ketua Polis Negara boleh mengeluarkan perintah-perintah pentadbiran, bernama "Perintah Tetap", yang tidak berlawanan dengan Akta ini atau dengan kaedah-kaedah atau Peraturan-Peraturan Polis yang dibuat di bawahnya, untuk kawalan dan arahan dan maklumat am Pasukan dan semua badan yang ditubuhkan atau didirikan untuk menjalankan tugas-tugas polis di bawah Akta ini.

98. Pemansuhan dan kecualian.

Undang-undang yang dinyatakan dalam Jadual Ketiga adalah dengan ini dimansuhkan:

Dengan syarat bahawa apa-apa kaedah-kaedah, peraturan-peraturan atau perintah-perintah yang dibuat di bawah undang-undang yang dimansuhkan di bawah seksyen ini setakat mana ianya tidak berlawanan dengan Akta ini, hendaklah masih berkuatkuasa, dan terus berkuatkuasa sehingga digantikan atau dibatalkan dengan kaedah-kaedah, peraturan-peraturan atau perintah-perintah yang dibuat di bawah Akta ini.

99. Masa peralihan.

(1) Berkenaan dengan anggota-anggota Pasukan seperti ditubuhkan di bawah Akta ini, peruntukan-peruntukan berikut hendaklah berkuatkuasa—

- (a) kecuali sebagaimana diperuntukkan dalam perenggan
- (b) bagi tujuan membayar pencen, ganjaran atau elaun-elaun lain kepada anggota Pasukan, Ordinan Pencen 1951, bagi Negeri-Negeri Tanah Melayu dan apa-apa

kaedah-kaedah, peraturan-peraturan dan perintah-perintah pada masa tersebut berkuatkuasa di Negeri-Negeri Tanah Melayu adalah terpakai kepada anggota-anggota itu; dan bagi maksud perenggan ini Ordinan, kaedah-kaedah, peraturan-peraturan dan perintah-perintah yang tersebut di atas hendaklah diperluaskan ke Negeri Sabah dan Sarawak dengan pengubahsuaian-pengubahsuaian yang mungkin perlu untuk menguatkuasakan perenggan ini;

- (b) anggota-anggota Pasukan yang kepadanya mana-mana undang-undang lain berhubungan dengan pencen, ganjaran dan elaun-elaun lain dipakai sebelum sahaja Akta ini mula berkuatkuasa hendaklah seterusnya terikat oleh undang-undang itu; dan jika mana-mana undang-undang itu dimansuhkan oleh Akta ini undang-undang itu hendaklah walaupun telah dimansuh bagi maksud perenggan ini sahaja terus dikuatkuasakan dan mempunyai efek ke atas anggota-anggota tersebut;
- (c) berkenaan dengan anggota-anggota Pasukan di Negeri-Negeri Sabah dan Sarawak, tiada apa-apa jua dalam seksyen ini boleh menyentuh atau mengambil daripada mana-mana anggota apa-apa terma atau syarat perkhidmatan yang diberi kepadanya atau dinikmati atau didapati oleh mereka sebelum sahaja Akta ini mula berkuatkuasa.

(2) Berkenaan dengan anggota-anggota mana-mana badan bantuan yang ditubuhkan atau didirikan di bawah mana-mana undang-undang yang dimansuhkan oleh Akta ini, anggota-anggota itu hendaklah walaupun dimansuhkan undang-undang itu terus menjadi anggota-anggota badan-badan tersebut seolah-olah badan-badan itu ditubuhkan atau didirikan di bawah Akta ini sehingga dilepaskan atau dilantik mengikut Akta ini.

100. Mengubahsuai undang-undang lain.

Apa-apa rujukan dalam mana-mana undang-undang lain kepada pangkat yang diadakan atau dibenarkan oleh mana-mana

undang-undang yang dimansuhkan oleh Akta ini hendaklah selepas Akta ini mula berkuatkuasa diubahsuai dan ditafsirkan sebagai pangkat yang setara yang diadakan atau dibenarkan oleh Akta ini.

JADUAL PERTAMA
(Seksyen 2 dan 5 (2))

PANGKAT POLIS

1. **PEGAWAI KANAN POLIS—**
 - Ketua Polis Negara**
 - Timbalan Ketua Polis Negara**
 - Pesuruhjaya**
 - Timbalan Pesuruhjaya**
 - Penolong Kanan Pesuruhjaya**
 - Penolong Pesuruhjaya**
 - Penguasa**
 - Timbalan Penguasa**
 - Penolong Penguasa**
 - Ketua Inspektor**
 - Inspektor Kanan**
 - Inspektor**
 - Inspektor Percubaan.**

2. **PEGAWAI RENDAH POLIS—**
 - Sub-Inspektor**
 - Sarjan Mejar**
 - Sarjan**
 - Koperal.**

3. **KONSTABEL**

JADUAL KEDUA
(Seksyen 13, 39 dan 48)

AKUAN JAWATAN

Saya, (nama), adalah dengan sesungguhnya, ikhlas dan sebenarnya mengaku bahawa saya akan berkhidmat dengan baik dan taat sebagai -----
----- (jawatan) Polis Diraja Malaysia dan akan menurut mempertahankan dan memelihara undang-undang Malaysia, dan bahawa saya akan melaksanakan kuasa-kuasa dan tugas-tugas jawatan saya dengan jujur dan rajin.

Diakui di ,pada.. ..haribulan.... .20.

Tandatangan

Di hadapan saya,

JADUAL KETIGA

(Seksyen 98)

PEMANSUHAN

	(2)	(3)
P.T.M. 14 tahun 1952	Ordinan Polis	Keseluruhannya
Sarawak Bab 22	Ordinan Konstabel	Keseluruhannya kecuali peruntukan-peruntukan seksyen 50 berhubung dengan kesalahan-kesalahan disiplin sehingga digantikan dengan peraturan-peraturan yang dibuat di bawah seksyen 96 (2) (b) Akta ini
Sabah Bab 101	Ordinan Pasukan Polis	Keseluruhannya kecuali peruntukan-peruntukan seksyen 30 berhubung dengan kesalahan-kesalahan disiplin sehingga digantikan dengan peraturan-peraturan yang dibuat di bawah seksyen 96 (2) (b) Akta ini
Akta 30 tahun 1963	Akta Polis Diraja Malaysia	Keseluruhannya
Akta 69 tahun 1966	Akta Polis Diraja Malaysia (Pindaan)	Keseluruhannya

AKTA POLIS 1967

(Akta 344)

SENARAI PINDAAN

<i>Undang-undang yang meminda</i>	<i>Tajuk ringkas</i>	<i>Berkuatkuasa dari</i>
Akta A45	Akta Polis (Pindaan) 1971	30. 4.1971
Akta A160	Akta Mata Wang Malaysia (Ringgit) 1975	29. 8.1975
Akta A347	Akta Polis (Pindaan) 1976	6.1976
Akta A354	Akta Perlembagaan (Pindaan) 1976	27. 8.1976
Akta A514	Akta Perlembagaan (Pindaan) 1981	15. 5.1981
Akta A516	Akta Polis (Pindaan) 1981	29. 5.1981
Akta A685	Akta Polis (Pindaan) 1987	8. 1988

SENARAI UNDANG-UNDANG ATAU BAHAGIAN- BAHAGIANNYA YANG DIGANTI

<i>No.</i>	<i>Tajuk</i>
41 tahun 1967	Akta Polis 1967

Ruangan ini dibiarkan kosong dengan sengaja.

PERINTAH WILAYAH PERSEKUTUAN LABUAN (PENGUBAHSUAIAN AKTA POLIS) 1985*

PADA menjalankan kuasa-kuasa yang diberi oleh seksyen 6 (3) Akta Perlembagaan (Pindaan) (No. 2) 1984, Yang di-Pertuan Agong membuat perintah yang berikut:

1. Nama dan mula berkuatkuasa.

Perintah ini bolehlah dinamakan **Perintah Wilayah Persekutuan Labuan (Pengubahsuaian Akta Polis) 1985** dan hendaklah disifatkan sebagai telah mula berkuatkuasa pada 16hb April 1984.

2. Pengubahsuaian Akta Polis 1967 dan perundangan subsidiari yang dibuat di bawahnya.

(1) Ubahsuaian-ubahsuaian yang dinyatakan dalam Jadual, iaitu ubahsuaian-ubahsuaian yang didapati perlu atau bermanfaat oleh Yang di-Pertuan Agong bagi menghapuskan kesulitan-kesulitan atau oleh sebab lulusnya Akta Perlembagaan (Pindaan) (No. 2) 1984, hendaklah dibuat dalam peruntukan-peruntukan Akta Polis 1967.

(2) Perundangan subsidiari yang dibuat di bawah Akta Polis 1967 hendaklah dibaca bersama-sama dengan perubahan-perubahan yang bersamaan tentang nama-nama atau titel-titel sebagaimana yang perlu untuk menyelaraskan perundangan subsidiari itu dengan Akta Polis 1967 sebagaimana yang diubahsuaikan oleh Perintah ini.

JADUAL

(1) <i>Peruntukan Akta Polis 1967</i>	(2) <i>Ubahsuaian</i>	
Seksyen 2	Masukkan selepas subseksyen (2) subseksyen yang berikut:	

“(3) In so far as this Act and any other written law apply to the Federal Territory of Labuan, references to “police district” and “Officer in Charge of Police District” in such laws shall, until police districts are specified by the Inspector General of Police within the Federal Territory of Labuan, be construed as

*PU (A) 197/1985.

(1)
*Peruntukan Akta
Polis 1967*

(2)
Ubahsuaian
references to “the police contingent of the Federal Territory of Labuan” and “Chief Police Officer of the Federal Territory of Labuan” respectively; and where such laws provide for an appeal to the Chief Police Officer against the decision of an Officer in Charge of Police District, such appeal shall be read as an appeal to the Inspector General of Police”.

Diperbuat pada 9hb Mac 1985.

Ruangan ini dibiarkan kosong dengan sengaja.